

# MVWA NGÜUMVWA KADI

## MPINDYEWU NGÂMÒNÙ



Sòmbelàayi panshi. Mbîmpè bwà kwikala baalùkile cyàkàbidi dilòòlò edi. Tudi ne kusàkidila bwà kwikala ne mpùngà ewu cyàkàbidi mpindyewu bwà kusadila Mukalenge. Nènku paanyimà pàà mumanè kunùlama ntàntà mule be dilòòlò dishààle adi, ndi ngumvwa ne kí mbifwànyine kwikala bîmpè bwà kunùlama kàbidi ntàntà mule dilòòlò edi to.

<sup>2</sup> Ànu panyimà pààpa mvwa ntèeleja mwanèètù udi nyààneetù, mu Mukalenge, ucidi ufikilakù ùfùmina ku Indiana, musumpakaja kùdì cilòòtà cyà pabwàcì. Kacya yèyè kàtukù mwânji kwikala mu Shreveport kwònsò eku to, kacya bààmulela. Kàdi ùvwa mulòòte, dilòòlò adi ne, ùvwa mulwè ku Shreveport, kacyi ku kàshinyi kèndè aku to. Kàdi mulwè ne. . . anyi mulwè mwaba kampànda, mu èkèleeziyà mùmvwà ngààkula. Yèyè kwamba, paanyimà pàà mèmè mumanè kuyiisha ne musambidile bantu, kwamba ne: “Cintu kampànda necyèzekè.” Yèyè kwamba ne: “ùvwa mwalùkile pàakacyàbu.” Kì yèyè kwamba ne: “ùvwa mumanyè nzùbu awu, mùshindù mwine wùvwàyì ùmwèka’s.” Yèyè ne: “Kùvwa—kùvwa dibàlaasà dyà beena ditùnga dijimà dinsambù dyà mùsèèsù, kàdi kabààkabwelakù mu dibàlaasà amu to.” Kwambayè nè: “Ùvwa elu luseke, mu nzùbu wa mabwe uvwa ne dyàpà ku luseke lwèndè aku, nènku nzùbu awu ùvwa mwimàne ànu mùshindù ewu.” Nè m—mwànà wa balùme awu mmulòoci wa bilòòtà, mèmè nkààdikù mumòne bilòòtà byèndè ne mumanyè ne mbilelèlà.

<sup>3</sup> Kì yèyè kwamba—kì yèyè kwamba nè: “Pashìishe mu dilòòlò dyà ndekeelu” nè mvwà “ngààkula ne nsambidila babèedi.” Kì mèmè kwamba ne: “Cintu kampànda cidi pabwìpì ne kwenzeka.’ Kì kuumvwikaci bu kàpatà kàà mukungulu.” Kì yèyè ne: “Bantu kubangabò kwela mbilà mikolè.” Kì yèyè ne: “Pàbangì dikùbàkùbà kujika, èè,” yèyè ne, “Dyòdi kupàtula díyì, ne kubanga kwakula.” Yèyè ne: “Dyakula adi dívwa dyènda díya ditùngùnùke, nànkù lwà mu nkànù yà màdidiishi eyi (màdidiishi à kuulu aa) kulwakù Butùmbi bwà Nzambi, bwikàle bùbwela, mu mmwènekelu wa Dikunji dyà Kapyà.” Kacya yèyè kàtu mwânji kuDìmònakù to. Ùkaadi mutuumvwe twakula bwàDì, kàdi kàtu mwânji kuDìmònakù yèyè mwinè to. Kì yèyè ne: “Kì Dyòdi adi’s, dilwila ku màdidiishi mùshindù ewu, ne kwenza Bukènkè abu bu munùdì numòna mu fòtò amu, kumutù menemene kwà batèeleji eku.” Kì yèyè kwamba ne: “Bùvwa bwàmba cintu kampànda munkaci mwà kukungula.” Kì yèyè ne: “Mèmè kwimana, kwamba ne: ‘Awu’s n’Yehowàh Nzambi.’”

4 Ki yêyè kwamba ne “cintu aci kumuvùlwija bwà (dìbà òwàwà wèlanganaPù meeji) cikondo cyàkabiikilà Mòsà kùdi...cyàkapàtulaye cisàmbà pambèlù pàà Èjiiipitù. Ki kwambabò nè: ‘Mòsà àkulè yêyè, kàdi bwà Nzambì to, bwà katwikadi twâlwa kufwà.’”

5 Yêyè ne: “Bantu bônso bàvwa batwè byâdi panshi, nè byanza byàbò byela muulu, bèèla mbilà mikolè.” Kwambayè ne “yêyè pèndè, ùvwa wèla mbilà mikolè ne: ‘Mukalenge Nzambì, ndi muKunangè! Ndi muKunangè!’” Ke mukàjèndè kumunyùkushayè ne kumutàbulujayè.

6 Ndi mmumòna wènda ùpweka ne kajila aku mpindyewu mene, Mwanèètù Jackson, muyiishi wa kale wa ba-Méthodistes. Nènku ùvwa mutàcishiibwe bikolè, too nè mwàkapwekayè; e kwambayè pàkabwèlaye, ne yêyè “ùvwa mupeté cikùmà cinène,” ànu menemene mùshindù ùvwa mukumòne mu cilòòtà awu. Ncyèna mumanyè cidici cyùmvwija to. Mukalenge kì mmucimanyishe to. Kàdi cintu kampànda ncifwànyine kwenzeka, pa kumòna Mwanèètù Jackson ngudi mucilòòte, mùndì mumumanyè bu muntu wa kweyemena, mulelèlà—mulelèlà, musadidi wa Nzambì.

7 Ne ndi—ndi mumanyè mùtùye ùlòòta bilòòtà, ùlwa kùndi, ne Mukalenge ùùmpèsha dyumvwija, bitu ànu pyòpyopyò mùshindù awu. Nànsha mene, musangu kampànda, diya dyànyì dyà ku Arizona, ùvwa mupeté cilòòtà cyàdi.

8 Nènku mmutàmbe kutàcishiibwa bikolè. Ùdi ne mukàjèndè, ùvwa mulwe nendè. Ùdi ne cyà kulela mwàna àbidì aa, ne mùshindù wùmwepelè wùvwayekù mwà kuya wùvwa nku ndèkè. Kàvwa ne dyeyà bwà kulwayè to, kàdi muntu kampànda kumupèèshayè mfrangà. Nènku mbikùmbàne mu mùshindù ùdi ùkèmeshà, mu mùshindù wà ne cintu kampànda cidi mwà kwenzeka; tudi tutèkemena nànkù. Katwèna ànu bamanyè cyàtùlongolwelà Mukalenge to.

9 Mpindyewu, tudi ne kusàkidila kùdi Mukalenge bwà kwikala ne mwoyi mu ditùkù ditùdi ne mwoyi edi, pabwìpì menemene ne dilwa dyà Yesù. Ànu mùngàmbì kumpàla amu, ncikondo citàmbe bunene cyà maalulmalonda ónsò. Mbipiciibwe ne mémè mwikàle ne mwoyi mpindyewu mene pamutù pàà mu cikondo kanà cyónsò, bwà . . . pa buloba.

10 Ndi mmòna kaaba aka kumpàla kwètù eku, cyàkàbidi dilòòlò edi, mmulundà wanyì mwìmpè, Mwanèètù Dauch. Mvwa mumutèèle mu nzùbu wa dibàlaasa mu dindà emu. Mwanèètù Dauch ùdi ùja bidimu makumi citèemà ne bisàtù leelù ewu, mùshindù mwinè ùdibi bibènèshiiibwe’s wè. Mmufile mwoyi wèndè mule awu ku butùmbì ne luumù lwà Nzambì, bidimu makumi citèemà ne bisàtù leelù ewu. “Mufikilu wà dilediibwa wà disànkà” kùdi, mwanèètù wanyì! Ne ndi mumanyè pambèlù, kwìnshì, mu ditùnga dijimà emu mùdìbo bàtèèlejila dilòòlò edi

emu, bàdi kàbìdi bàjingila Mwanèètù Bill Dauch “Mufikilu wà Dilediibwa wà Disànkà.” Yèyè mmulundà wa katàpùlà-katèèka wa Oral Roberts, ne bààbùngì, mwambùlwishe bikolè mu njila wa Èvànjeeliyò ewu, ne bikwàbò byònsò. Mmulundà wetù munène.

<sup>11</sup> Ndi ne disànkà dyà kumòna Mwanèètù Mann mwaba ewu, muyiishi mukwàbò wa ba-Méthodistes, musùngidiibwe ne mubàtùijibwe ne Nyumà Mwimpè, ne mu Dînà dyà Yesù Kilstò, musòmbe kaaba aka. Yèyè, ùdi pèndè, umwe wa ku beena dyètù bàà mu Indiana. Ne ndi ngumvwa ne Mwanèètù Hickerson mmusòmbe ku luseke lwèndè eku, umwe wa ku balami bèètù bàà mu Jeffersonville, mu Indiana (bàdi munkaci mwà kutèèleja kwàka dilòlò edi). Ne ndi ngumvwa ne Mwanèètù Wheeler, umwe wa ku balami bakwàbò abu ùdi kaaba aka mwaba kampànda. Kadi ncyènà—ncyènà mwànji kujandula mwaba ùdiye to, muntu nyewù ùmfunkwina kwàka nènku nemmwangùlè mu katanci kakesè emu; mmusòmbe kuntu kwàka, lwà kuntu kwàka ku dyàbalùme, èyowà.

Mwanèètù Banks Wood, pawikalà utèèleja dilòlò edi, mwanèènù wa balùme ùvwa kaaba aka makèèlèlè dilòlò awu. Mvwa mumumòne pàmvwà mpàtuka apu, Mwanèètù Lyle. Ntèmu wa Yèhowàh; musùmbà mujimà awu ùvwa mukùdimùne mucima. Lyle wàkabwejiibwa bwà cikèènà-kumòna cyà Mukalenge.

<sup>12</sup> Lyle ùvwa musòmbe mu bwàtù ditùkù adi, pàvwà ditùkù òvwà didyànjlile bamwambila ne “cintu kampànda” ciwva “ne cyà kwenzeka bwà dibiishiibwa dyà ku lufù dyà mwoyi.” Yèyè ùvwa Ntèmu mulelèlè wa Yèhowàh, yèyè pèndè! Kadi mu dindà adi, musòmbe mwaba awu, ùlòba, ki kukwàtayè. . . Èè, ùvwa ne ndòbo munène, wa kale (wa cyena Kentucky awu, nudi bamanyè’s) . . . ndòbo munène kadi, kaamushipa kakesè menemene kumuminakù. nènku wàkakòka bidyakadyaka, byàmunda ne byònsò pambèlu, è kukàkùpayè pa màyi (kaamushipa kakesè, kanzèlèlèngè), ne kwambayè ne: “Èè, kalùmnyànà, wadimuku’s.” Kalùmnyànà aku. . . kènda kàlèlème pa màyi, kufwàku, cipeepèle kukàsàka kukàbweja mu mbata yà mu dijiba adi.

<sup>13</sup> Nènku ditùkù kumpàla, mèmè musòmbe, mvwa mwambe ne: “Nyumà Mwimpè ùdi ùngambila ne ‘nekwènzekè dibiikà dyà ku lufù dyà kaacifùkiibwà kakesè.’ Míngà misangu nkufwànyine kwikala ka—kànà kàà mpusù, pangàalukila kumbèlu, bwalu ànu. . .”

<sup>14</sup> Patùvwà tuteeta bwà kuumbula bìshì kampànda byà ku ndòbo, Mwanèètù Wood ne mèmè, ùdi munkaci mwà kutèèleja dilòlò edi awu, kànà kàànyì kàà bakàji kàkaadi mushikaankùnde musòmbe mwab’ewu, mubangila kùdi mùsàlaayi muleep’ewu. Pàvwàbo. . . Kuseemenayè, kwambayè

ne: “Papa. . .” Yèyè ne nsongàakàjì mukwàbò mutekète awu, kwambabò ne: “Tudi. . .” Mpindyewu, muntu yònsò ùdi mwà kwikala ne nyama wa kumbèlu wa mùshindù udiyè muswè, kàdi ncyà bushùwà ne mèmè nciwu munangè kaampuusù to, pa nàнку yèyè. . . anyi Branham nànsha umwe to. Ki twètù. . . yèyè ne: “Kaa, s’tudi bapete kaampuusù kakwàte ne byà luse mwab’ewu, Papa. Nka—nka—nkadyè cintu kampànda ki bwà cinyi kàdi. . . muntu kampànda mmukàlunge, kòkò kwònsò nkùle katuntùle.” Yèyè ne: “Papa, s’nekàfwe dyàkàmwè, tudikù mwà kupeta kashètè kakesè bwà kukàlama ndambù wa matùkù anyi?”

15 Mèmè ne: “Enza ngànji mmonèbi kaampuusù aku.” Èè, kuyabò e kwangata kaampuusù aku. Mèmè kumòna cìvwàci, ki mèmè kumupèèsha kashètè. Nènku pàakacyàbu mu dindà, mùvwà twànà twà mpuusù tutwè ku mwandamutekète anyi mwandamukùlù mwaba awu, nudi bamanyè’s. Pa nàнку mwanàanyi mukesè wa balùme, Joe, kwambulayè kàmwè kàà ku twòtò, ne kukàkàmayè ne kukàmacishayè panshi; nènku ànu—ànu. . . kalùmyànà kakesè aku kulààla mwaba awu kadinyènga eku ne eku, kukàshipaye’s.

16 Ki mèmè kwambila Mwanètù Lyle, mwanàabò wa balùme, Mèmè kwamba ne: “Udi mumanyè’s, mbifwànyine kwenzeka ne ciikalè kànà kàà mpuusù aku kiikalà ne cyà kubishiibwa, bu mutùkaadi bamòne Mukalenge wènza bintu.”

17 Mwanètù Lyle, muciiakàle muntu mupyamùpyà menemene mu njila awu. Nyumà Mwímpè ùcìvwa mufùmìneku ku dimwambila nè ùvwa musèlàngàne, ne cìvwayè mwènzè, ne maalu mabì àvwàye mwènzè, bintu biinè bìvwayè mwènzè abi. Èè, kudyàmbidilayè ne Mwanètù Banks ùvwa ùngambila bintu abi. Kàdi dîbà dyàkamwelàCi patòoke menemene, ne kumwambila cìvwayè mwènzè dilòlò dishààle adi, aci cìvwà—aci cìvwa cimutàmbe bukolè. Kàvwa mwà kucyùmvwà nànsha.

18 Pashìshe, pàakacyàbu mu dindà. . . Patùvwà balobe bufùkù bujimà abu, ne tuumishipa tukesè, tuvwa munkaci mwà kutùkwàta ndambù bwà kulòba naatù. Kàdi yèyè wàkakùpa ànu kaamushipa kakesè aku mu màyi, kòkù kuzakalala, kutàndabalakù. Paambi citùpà cyà dîbà kukùmbana tuvwa basòmbe mwaba awu, nènku mèmè mvwa. . . Mèmè kwamba ne: “Mwanètù Lyle, wèwè ngudi mulekèle mushipa awu wùmina ndòbo too ne mu cifù. Wamònu anyi?” Mèmè kwamba ne: “Angàtà mwonji wà ndòbu, uwùkùpè kule, cìshi cikàle patòoke mùshindù awu; ànu pàdiye ùcilenga,” Mèmè kwamba ne: “nàнку shààla mumukwàte ne pashìshe ùmukòka.” Mèmè kwamba ne: “Yèyè. . . kùmpulùmùnù mùshindù awu to, kaciminyi to, udi ukwàta mushipa.”

19 Yèyè ne: “Èè. . .” Yèyè’s ùvwa ne nshinga munène, munène wa kale mulembelejapù, wàmba ne: “Ewu ki mùshindù wutùdi tucyènza,” mùshindù awu.

20 Pa nànkù, ànu bu pa diinè díbà adi, mèmè kuumvwa Cintu kampànda cipweka ku lusongo lwà mukùnà kwàka, mvùnda, wènda ùnyùnguluka. Ki Yèyè udi upweka ewu mùshindù ewu, ne Nyumà wa Nzambì kulwa pa bwátù, kwamba ne: “Juuka kuulu.” Yèyè ne: “Akula ne mushipa mufwè awu. Ambà ne: ‘Ndi nkupèeshulula mwoyi wèbè.’”

21 Ne kaamushipa kakesè aku kàvwa kalààle mwaba awu munda mwà tusunsa makumi àsàtù, ne twàmunda twàkù ku mishìku, ne bidyakadyaka byàkù. Mèmè kwamba ne: “Wèwè kaamushipa kakesè, Yesù Kilstò ùdi ùkwalujila mwoyi wèbè. Ikàlà ne mwoyi, mu Dìnà dyà Yesù Kilstò.” Kwòkò kukùdimuka, nè kwòkò kudiina mu màyi e kuya lùbilù lwà mùsà.

22 Mwanèètù Lyle, udi kaaba aka mwaba kampànda anyì? Mvwa—mvwa mukumòne makèlèlè dilòòlò awu. Nànsha yèyè usanganyiibwa munda amu, pambèlu, anyì mwaba ùdiye ùsanganyiibwa, elà cyanza cyèbè muulu ní ndi mwà kukumòna. [Muntu kampànda ùdi wàmba ne: “Cisàsà.”—Muf.] Wamba ne? Mu cisàs-. . .Kaa, èyowà’s, lwà kuulu ku cisàsà kwàka, ku màdidiishì à paanyimà pààpa. Ki muntu nyèyè awu, Ntèmù wa Yèhowàh.

23 Yèyè kwamba ne: “Mwanèètù Branham!” Ùvwa musalùke yèyè yònsò, kwambayè ne: “Uh, mbímpè—mbímpè bwà kwikala kaaba aka. Kí mmwòmò anyì?” Yèyè ne: “Uh-uh, udi—udi. . . Uh, udi wela meeji ne aci cìvwa ciswa kwamba bwànyi mèmè, bwà—bwà—bwà, bwalu ngákambila kànà kàà mushipa, kwamba ne: ‘Wadìmuku’ anyì?” Yèyè ne: “Aci—aci—aci cìvwa cyùmvwija cintu kampànda bwànyi mèmè anyì?”

24 Mèmè kwamba ne: “Bwàlà, Bwàlà, ànu dishìndika.” Ùvwa musalùke yèyè yònsò.

25 Èè, tutu twaya eku ne eku ne nudi numòna bintu abi byènzeka, bamanyè. . .Mpindyewu, elààyìbì ànu meeji, cìvwa mbwà kuleeja ncinyì? Mvwa ne bânà bàà mfwènkè pa dibèèjì dyànyì dyà bàadisambidila adi, munkaci mwà kusambila bwà cyòcì aci, kàdi pààkalwà cìkèènà-kumòna aci cìvwa mbwà kaamushipa kakesè kàà kale kàà bule kampànda, bule bwà byàlà bìbidì anyì bisàtù. Bìvwa bimwèke ànu bu ne ndòbo ne mushipa bivwa bunène bùmwè. Kàdi cìvwàku ncyà nè, cìvwa mbwà kunùleeja ne Nzambì ùdi ùtàngila ku tuubintu tukesè atu pààtù. Nwamònu anyì?

26 Dìngà ditùkù pàvwà beena nsudi bàsanganyiibwa mu ditùngà dijimà, Wàkakwàta mudimu ne bukolè Bwèndè ne kwela mucì mulawu. Wàkabanga kufùbidila, pàvwàku bantu bàsanganyiibwa myaba yònsò biikàlè bàkèngela bukolè bwà dyondopa abu. Kàdi, nudi numòna’s, Yèyè ùvwa muswè kuleeja ne Yèyè ùdi Nzambì kumutù kwà byònsò, nànsha ciikàlè cikesè, nànsha ciikàlè cinène, nànsha ciikàlè cinyì. Yèyè ùcidi ànu Nzambì kumutù kwà bintu byònsò, bufùki bujimà. Pa

nàнку tudi baMunangè bwalu. . . Acì—acì cìdì cìtùfikisha bwà kumanya nè, piikalàYe ucyùka bwà kwakula Dìyì dyà mwoyi kuwùbweja mu kaàmushipa kakesè kàdi kakàyi ne musinga kalààdika mwaba awu kafwè, pa màyi munda mwà citùpà cyà díbà, ncyà bushùwà ne Yèyè ùdi mwà kwakula kubweja mwoyi díngà ditùkù mu bânà Bèndè. Nànsha byòbi ne mubidi wèbè ùkaadi mushààle ànu nkutu wa lupwishi, Yèyè neàkule, ne twètù netùMwandàmùnè díngà ditùkù. Yèyè ùdi Nzambì Udi ucyùka kantu ne kantu, byònsò bitùdi twenza, byònsò bitùdi twamba, bintu byònsò. Yèyè ùtu ùbicyùka.

Mpindyewu twìnyikàayi mitù yètù, myaba yònsò.

<sup>27</sup> Ndi ndìkonka mpindyewu, kumpàlà kwà twètù kusambila, kwòkò muntu kampànda dilòlò edì udi uMucyùka, kàdi kùyì mwànji kulamisha mwaba wèbè bwà mu Buloba bukwàbò mutùdi tuya bwà kuMumòna. Udi mumanyè's, kwenà mwà kubwelamù kùyì mulamishe mwaba nànsha. Ne wèwè kwèna mwànji ànu kuwùlamisha to, kàdi udi muswè bwà bàkuvùlùkè mu disambila mpindyewu, bwà bintu byònsò bìlongolodiibwè pankaci pèèbè ne Nzambì dilòlò edì, swàkù wèlè ànu cyanza cyèbè muulu cyanaàna; newàmbè ne: “Wamvùlukakù, Mukalenge”? Wèwè udi . . . enzà ne Yèyè àmonè ànu cyanza cyèbè cyanaàna. Nzambì, enzàku nàнку.

<sup>28</sup> Taatù wa mu Dyulu, patùdi biimàne dilòlò edì pankaci pàà bàdi ne mwoyi ne bafwè apa; ne bintu bidì munkaci mwà kwenzeka mu matùkù aa ebi, kabìyi byùmvwika to, ncyà bushùwà ne kabyèna byùmvwika to; kàdi Nzambì, Wèwè ngudi mumanyè ne mbilelèlà anyì kí mbilelèlà, Wèwè udi Mulumbulwishi wa dísu dikolè wa maulu ne buloba. Nènku tudi twamba nùнку, Mukalenge, ànu bwà kukànkamika bantu (bìmwè byà ku bintu byùdi Wèwè mutùleeje), bwà bààmònakù mwà kukoleshiiibwa mu mabòko bwà kuKunanga ne kuKwitabuujà, kuKukwàcila mudimu, ne kumanya ne cyenzedi nànsha bàmba ne ncikesè bìshi, cìmpè anyì cibì, Wèwè udi ucimòna. Ndi ndòmba, Nzambì munanga, bwà Ùbeneshèku cyònsò cyà ku byanza abi dilòlò edì, ne musùkà ne nyumà bidì bisàke cyanza acì bwà kwediibwaci muulu. Nènku ndi ndòmba, Nzambì, bwà edì diikalè dilòlò didì dilamisha dyàbò dyà mwaba mu Buloba bwà dyàmwàmwa dyà musùlù adi mwà kwenjiibwa. Enzàku nàнку.

<sup>29</sup> Wondòpàku babèedi ne beena ntàtu, Mukalenge, ne bàdi apa, mu ditùnga dijimà mùdi byà—byà—byà ku tudyòmà bìpicila mu maatèlèfonè. Bènesàku aba bàdi kabàyi basungidiibwe abu, kuumukila ànu ku Californie too ne ku New York, kuumukila ku Canada too ne ku Mexique. Enzàku, Mukalenge, bwà muntu yònsò udi mwinshì mwà cyonà cyà díyì dyètù, dilòlò edì, àsungidiibwe ku mpèkaatù yèndè, òndopiibwe ku bubèedi bwèndè, bwà Bwikadi Bwèbè bwà Nzambì.

<sup>30</sup> Nènku Mwanèètù Jackson ewu, udi mubùùke ne ndèkè ntàntà wa kilòmèètà binunu ne binunu too ne mwab'ewu, bwà kwikala kaaba aka bwalu cintu kampànda cyà pabwàcì cìvwà civundùlùle mwoyi wèndè aci; “Nè nebàlootè bilòòtà, ne nebàmonè bikèènà-kumòna.” Nzambi munanga, Wèwè ngudi mucilame mùnsokòntò kùndi mèmè, cìdi cyòci eci cyumvwija; ncyèna mumanyè to. Kàdi bu Wèwè mwà kutùmwènekèlakù, Mukalenge, longòlòlaku myoyi yètù mpindyewu bwà dikùmbula adi. Bwà twikalè mu dindila dyà myoyi kuulukuulu, katùyì bamanyè ciWènzà to, ne katùyì bamanyè Wèwè ní udi mulayè bwà kutùmwènekela ku cilòòtà eci; katwèna bamanyè to. Kàdi tudi—tudi ànu tutèèla bintu bitùdi tuumvwa bulelèlè ebi ne, Wèwè utu mulayè bwà kukùmbula cisàmbà Cyèbè, nè tudi tulòmba bwà Wèwè kuDìvwija wa cyà bushùwà kutùdi kaaba aka. Mu Dìna dyà Yesù Kilistò mmutùdi tulòmba nùnkù. Amen.

<sup>31</sup> Mpindyewu, dilòòlò edi, paanyimà pàà mumanè kunùlama ntàntà buleyì menemene makèlèlè dilòòlò awu ne mu dindà emu, nè mèmè ndi ngènda ngùmvwa dýi dyènda dìmputa ndambù. Ndi ne kafulu kakesè kàa nsuki kántù naakù, kántù mvwàla mbwikila dibàla dyànyì *mwab'ewu* dibà dindì munkaci mwà kuyiisha. Kàdi ndi mukàpwe mwoyi musangu ewu, nènku lupepèlè elu, lùdi lùpita mu màdidiishi aa, ndubange kumpàcisha dýi ndambù mu—mukesè. Kale wàwa mvwa. . . bikaatukù bikèngela kwimanyika masangisha, kàdi kacya ànu ngàkàpeta, dibà adi ncìcyèna ntàcishiibwa kàbìdi kùdilu to, ndi ànu ntùngunuka. Kàdi ndi mukàpwe mwoyi, nènku kàdi. . . Ndi ne. . . mwènzè ànu bu udi mwà kuwùmvwa, pa nànkù masambila ènù neànyishiibwè. Nènku mpindyewu, aa mmasangisha àbìdi ditùkù dyònsò, nènku adi. . . mbyènzè bu bìdi. . . Nudi bamanyè's, paùkaadi mwenzè kilòmèètà yàbùngi, cidi. . . udi ucyumvwa mu mubidi's.

<sup>32</sup> Pa nànkù mpindyewu nwènù bàà mu Californie, ne mu Arizona mwàmwa, nyèwù tunùtùmina bònsò myoyi mu ditùnga dijimà. Mwanèètù Leo ne kasùmbù kàdi kindile Mukalenge ku Prescott aku, babùkidiibwe mpindyewu, ne nwènù bònsò bàà mu nyùngulukilu wa Phoenix, lumingu lujimà kuumukila ku dilòòlò edi, tudi ne cyà kwikala mu Yuma mu didyà dyà mikùkùku. Mbapànyishe tiki yàbò yònsò kuntu kwàka nè bapetè dibàlaasà dinène ditàmbe, kàdi kabàyì ànu nè mwaba wà kusòmbesha bantu nànsha. Pa nànkù lwàyì kumpàlà kwà dibà, nwènù bònsò, bwà—bwà kubwela. Pashiishe netùtungunukè tukabwela mu Los Angeles kubangila kuntwaku, mu dìmwè dilwalwà edi. . . mu dyàlumingu dilwalwà edi, mu dyàlumingu dilòòlò. Ne pa nànkù tudi bindile bwà kunùmòna nwènù bònsò kuntwaku. Mabènesha mabanjike à Nzambi ànwikile nwènù bònsò.

<sup>33</sup> Bwènù nwènù bàdi mu New York, ne nwènù bàdi mu nyùngulukilu wa Ohio ne mu myaba mishìilèshìilàngàne, àbìdi àdi pànshì aa ndi muswè kuyiisha Mukenji wà *Cikòkà Cyà*

*Nyòka* (nyamà wa ku cibangidilu, ne nyama wa ku ndekeelu), ku tabernacle. Billy neànütùmine kabèji bwà bwalu abu, cikondo citwàbwàkula aci, bwalu ndi ncyènza mu Tabernacle bwalu neciikalè, mèbà òwò makesè, neikalè ànaayi anyi mapite bule.

<sup>34</sup> Nàнку mpindyewu... pa nàнку ndi muswè bwà nwènu kaaba aka, apa ne mwaba kanà wònsò wunùdi nusanganyiibwa mpindyewu awu, bwà kubuulula mu Mukàndà wà Yobò. S'mMukàndà wà pabwàwù bwà kuyiishilamù, kàdi ndi muswè bwà kukwàta mudimu ne mèyi makesè mwab'ewu mpindyewu.

<sup>35</sup> Ne pashiishe, mààlabà mu dindà, ku tabernacle eku, nekwikalè masangisha à Kàlaasà kàà Dyàlumingu ku... Tudi tubanga apa pa díbà kaayi? [Mwanèètù wa balume kampànda ùdi wàmba ne: "Pa díbà citèemà ne tusunsa makumi àsàtù."—Muf.] Pa díbà citèemà ne tusunsa makumi àsàtù. Ne pashiishe ndi ne dyèsè dyà kwakula cyàkàbìdi kaaba aka mààlabà. Nèнку bu Mukalenge mwà kwanyisha, mwwa muswè kwakula pa cyena-bwalu... bu Yèyè mwà kwanyisha, mpindyewu, pàmvwà munkaci mwà kulonga eci mu mapingaja emu, bwà kunùleeja ne: "Kùdi mwaba ànu wùmwèpele wàtwilanganà Nzambì ne mukuukwidi." Uh-huh, ànu... Ne—ne ndi mwà kukwambila cìdi mwaba awu, ne cìdi Dìnà dyà mwaba awu, mwikalà Nzambì mwà kutwilangana ne mukuukwidi.

<sup>36</sup> Ne pashiishe, mààlabà dilòlò, nèngiikalè mwà kulòmba dinganyishila, mbwena kwamba ne, bwà disangisha dyà dyondopa. Nèнку ndi—ndi muswè disangisha dyà dyondopa dyà cyena kale. Nèнку bu Mukalenge mwà kwanyisha, ndi muswè kwakula pa cyena-bwalu cìvwà cindubàkàje bikolè leelù ewu... Pàvwà Mwanèètù Moore ne mèmè tuyiikila pambèlù pàapa pàmwè, bàmà bèètù bàà mushinga mukolè, tuvwa tuyiikilangana pa Mifundu. Kàdi mùshindù mwìnè ùvwàbi bilenga bwà kwikala ne bàmà bèètù, bu mu bikondo byà kale's. Ki yèyè ne: "Udi mumanyè's, Mwanèètù Branham, diyiisha dyònsò dyùkaadiku mutùyishè kaaba aka mu Shreveport emu, *Mwànà wa Mukòdòkò ne Nyuunyi Wa Nkuci* òvwà òvwè dyà ku mayiisha à pabwàwù awùkaadiku mutùyishè munwemu mu Shreveport emu." Kwambayè ne: "Ndi ncinka ne Mukenji wèbè mmutàmbe kwikala mujòbàkàne be leelù ewu, byà kùyì ufikakù ku wà bwena awu nànsha."

<sup>37</sup> "Pàndì nshìya Awu, s'ngàshìyi Mukenji wànyì." Dinanga ke wànyì...

Mwànà wa mùkòdòkò munanga udi upùnga ne  
lufù, Mashi Èbè à mushinga mukolè  
Kaàdyàkujimijakù bukolè bwàwù to,  
Too ne pùikalà èkèleeziyà yònsò mupikula wa  
Nzambì awu  
Mwà kusùngidiibwa, kàyikù mwà kwenza  
kàbìdi mpèkaatù to.



Kacya ànu ku diitabuuja ngamòna musùlù awu  
 Ùdi mpùtá yèbè mikàngula munkaci mwá  
 kufila,  
 Dinanga dipikudi dikaadi cyànyì cyena-bwalu,  
 Ne nêdìikalè nàнку too ne pàngaàfwà.

<sup>38</sup> Maaàlabà dilòòlò, cyòci diswa dyà Mukalenge, ndi muswè kuyiisha pa cyena-bwalu cyà ne: *Pa Mapwâpwâ À Nkuci Mutòòke Bu Néjè*. Maaàlabà dilòòlò: “Mukalenge mwikàle ùpweka pa mapwâpwâ à Nkuci,” mbwena kwamba ne, bu Mukalenge mwá kwanyisha, díyì dyànyì kadìyì ditámbe kwikala ne lutátu to. Mpindyewu. . . pa nàнку, nwátùsambidilaayikù.

<sup>39</sup> Ne pashìishe ndi muswè disangisha dyà milòmbò dyà cyena kale bu mutùvwà naadi ku cibangidilu amu, kakùyì dijingulula dyà meeji nànsha, ànu kufila cyanàànà kartà kùdi muntu yònsò udi muswè bwá kumusambidilabò awu. Mpindyewu, udi ne cyà kwikala ne kartà, pa nàнку ikàlà mwab'ewu kumpàlà kwá díbà bwá Billy wàmòna mwá kukupèeshayè kartà ne kukàtèeka mu mulongo. Wèwè kùyì mwenze nàнку to, bantu bàdi ànu bènda bàvula, ne bènda bàvula, ne bènda bàvula, ne kakwèna ndekeelu ku mulongo to. Muntu yònsò ùdi mwá kupeta kartà. Ndi muswè bwá Mwanèètù Jack ikalè mwimàne ku luseke lwànyì ku mulongo wà babèèdi, bu mùvwà ne ciibidilu cyà kwimana amu, ne Mwanèètù Brown bwá kulwa ne bantu kúndì pamutù pàà Billy Paul. Ndi—ndi—ndi—ndi muswè—ndi muswè mulongo wa babèèdi wètù wà cyena kale awu, nènku netùsambile ànu mùshindù utùvwà ne ciibidilu cyà kwenza kùkaadi bidimu amu.

<sup>40</sup> Ndi ne disànka dilòòlò edi dyà kwikalakù ne mwanèètù mukwàbò udi muswikakàne neetù, ndi mutàngile ànu ku luseke ne kujingulula díbà adi ne kumumòna, kùkaadi tusunsa, Mwanèètù Gordon Lindsay. Yèyè ngumwe wa ku bantu bèètù bàà kale, ùvwà neetù kùkaadi ntántà mule. Munkaci mwá kwenza mudimu munène, kutuuta mikàndà ku cyamù, ùdi munkaci mwá kufùnda mukàndà wànyì ku cyamù mpindyewu: *Bi—Bikondo Mwandamutekète Byà Èkèleeziyà*. Tudi batèkèmene ne netwikalè naawù tàyàdi kàbìdi, *Bitampi Mwandamutekète*. Byòbì byenzèke ne yèyè àwùbalè kumpàlà kwá kuwùfundayè, netùpetè muyiiki wà tèlòlòjì. Ndi ànu mwá kucyùmvwà cyènda cilwa. Kadi yèyè's mmumanyè ne mèmè ncyèna mwena tèlòlòjì to. Pa nàнку. . . Èè, tudi bindile maaàlabà dilòòlò ne mwoyi mujimà. Pawìkalàmu, Mwanèètù Lindsay, ikàlà kaaba aka maaàlabà dilòòlò. Wèwè mulwè, seemèna pabwìpì ne wìkalè neetù ku cyambilu eku bwá disangisha dyà milòmbò dyà cyena kale adi.

<sup>41</sup> Mbanganyì bàdi baswè kulwa kumòna òmwè dyà ku àà cyena kale awu kàbìdi, mutùdi tubàndisha bantu? Aci's neciikale cyakàne. Mpindyewu, lwàyi ne babèèdi bèènù ne bàdi mu ntátu, maaàlabà dilòòlò, bwá kiipàcilà aku díbà adi.

42 Mpindyewu, nwênù bangàte Mukàndà wà Yobò, mvensà wa 42...anyi nshapità wa 42, nènku mvensà yisambòmbò yà mbangilu yà nshapità wa 42 wa Yobò ayi; bikèmesha be. Mwanèètù Ted Dudley, pawikalà utèèleja dilòòlò edi, mu Phoenix mwàmwa, udi muvùlùke ne mèmè ne wèwè tuvwa twakula musangu kampànda, kùkaadi bu lumingu lujimà anyi mbingu yìbìdì nànkù awu, ki twètù kutèèla cyòcì eci anyi? Mèmè kukwambila ne: “Dìngà ditùkù aci neciikale cyena-bwalu kùndì.” Nènku ndi muswè kukwàta naaci mudimu dilòòlò edi.

*Pashìishe wàkandamuna . . .*

*Pashìishe Yobò wàkandamuna MUKALENGE, wàmba ne:*

Tèèlejàayi ne ntèmà yònsò dibala edi mpindyewu.

*Ndi mumanyè ne wèwè udi mwà kwenza cintu cyònsò, ne cìnè aci kakùyì mpatà to kacyèna mwà kutàmba kukukolela wèwè to.*

*Ewu nganyì udi usokoka mubelu kàyì ne dimanya? ki bwalu kaayi ngaakùlù cìndì ncìyì mùmwè nànsha; bintu bìdì bitàmba kunkèmesha mèmè, bìmwà ncìyì mumanyè to.*

*Tèèlejà, ndi nkusèngelela, ne nengàakule: Nenkwelè lukonko, ne wèwè ùngambilè.*

*Mwà mùmwè bàakula bwèbè mu kutèèleja ne dicit: kadi mpindyewu mèsù àànyì àdi àkumòna.*

*Ki bwà cinyì ndi ndikìna mèmè mwìnè, ne nyingalala mu lupwishi ne butù.*

43 Mpindyewu ndi muswè kwangacila cyena-bwalu ku mvensà mwi5 awu.

*Mwà mùmwè bàakula bwèbè mu kutèèleja ne dicit: kadi mpindyewu dísù dyànyì dyàkumònu.*

Mukalenge àbèneshèku Dìyì Dyèndè.

44 Yobò, twàngatàayi ndambù wa mwoyi wèndè. Yobò ùvwa mupròfeta. Yèyè ùvwa muntu uvwa ne mwoyi kale wàwa kumpalà kwà Bible kufùndiibwayè. Bàvwa bèèla meeji ne Yobò ùvwa ùmwè wa ku Mikàndà yà kale menemene yà Bible, bwalu Wàkafùndiibwa kumpalà kwà Genèsè kufùndiibwayè. Yobò, mulwanganyi munène wa mvità ne mupròfeta ewu, ùvwa muntu wa—wa bukolè mu ditùkù dyèndè. Kakùyì mpatà to nè yèyè wàkajuuka ne wàkakwàcila Mukalenge mudimu mu matùkù èndè ónsò à mwoyi. Ne ùvwa ne nsòmbelu wa bukitù kùdì bantu, bònsò bàvwa ne kaneemu bwèndè yèyè.

45 Kàdì wàkafika mu mùshindù wà mùdiye ùcibìikila kaaba aka ne, mwikàle *mwediibwe matèyi* kùdì Mukalenge. Kàdì ndi muswè kwangata mème mwàkù wà, mwikàle “mwediibwe ku diteeta” kùdì Mukalenge. Ne mu bulelèlè: “Mwànà wa balùme yònsò udi ulwa kùdì Nzambi ùdì ne cyà kwanji kuteeciibwa

dyàmbedi, kwediibwa ku cipimu, mwânà mulongesha.” Nènku dîbà didi diteeta dîkola, ne twela meeji ne dyàtâmbi kukola ne katûyi tutèeleja (kufila ntêmà), dîdà adi Yèyè kwamba ne twêtû “tudi tulwa mwânà mulela mu masandi, kàdi katûyi mwânà wa Nzambi to.” Bwalu, kakwèna cintu nànsha cimwè cidi mwà kusàka mwânà mulelèlè, mulediibwe cyàkàbìdì kùdì Nzambi kule ne Muledi wendè, nwamònu’s, yèyè ùdì citùpà Cyèndè. Kùvwakù mufwànyîne kucivila, kutâmba mùdì mufwànyîne kùdivila wèwè mwinè to. Nwamònu’s, uvwa mupetè dilabula adi, udi mulongesha ne mwedìibwe ku cipimu.

46 Nènku mpindyewu, muntu ewu bu mùvwàye mupròfeta, ùvwa mupete mùshindù wà kufika ku ngàsà wa Nzambi, kàdi Yobò kàvwa ne Bible wa kubala to. Yèyè . . . Bible kàvwa mwànji kufùndiibwa musangu awu to, kàdi wàkafika kùdì Nzambi ku dibuulula ne ku cikèèna-kumòna. Aci civwa nkumpàlà kwà Bible kufùndiibwayè.

47 Mpindyewu, tudi tujandula, ne twangata ndambù wa mwoyi wèndè, ne pàakamubèneshà Nzambi ne kumwenza muntu munène. Mòna’s, nànsha bantu bònsò mene bàvwa bàmunemeka, nànsha ku meeji èndè mene, wàkashàala muntu munène. Dìsòndiibwa Dyèndè dyà kùdì Nzambi dyàkamushindika bu musadidi wa Nzambi, bitòoke tòò, too ne mwàkafùmà bantu myaba yònsò bwà kumutèeleja. Ne pashiishe ke Sàtaanà kubangayè kufùnda muntu awu. Nènku mmùshindù awu ùdiye wènza musadidi yònsò udi musòndiibwe kùdì Nzambi, Sàtaanà ùtu misangu yònsò ànu kuntwaku bwà kumufùnda bwà byònsò bìdiye wènza bìdì kabìyi bîmpè to.

48 Nènku, mpindyewu, tudi tujandula nsòmbelu wendè ne mateeta, ne diitabuujà dyèndè dinène. Nànsha Yesù mene, pàakalwàYe pa buloba, Wàkaleedila ku lutùlù lwà Yobò. Wàkamba ne: “Kanwàkabalakù bwà lutùlù lwà Yobò anyi?” Diitabuujà dùtù dindila ne lutùlù bwà Dìyi dilaya kuuladi.

49 Mpindyewu, tudi tumòna apa ne Yobò, paanyimà pàà yèyè mumanè kupicila mu mateeta èndè, ntàtù yèndè yònsò ayi . . . Ùvwa ne dîkù dilenga, bàkamunyèngabò. Ùvwa ne bukolè bwà mubidi, bàkamunyèngabù. Cintu cyònsò civwàye naaci mu mwoyi ewu cyàkangaciibwa. Ne wàkasòmba pa mushiki wà butù, ne ciyooyi, munkaci mwà kudikoonya byùjà. Ne nànsha mene mukàjèndè mwinè, wàkaakula bibi bwèndè yèyè, wàmba ne: “Bwà cinyi kubènga kwela Nzambi awu mulawu, kàdi kufwà’s?”

50 Yèyè kwamba ne: “Wèwè’s udi wakula ànu bu mukàjì mukùtākàne.” Yèyè kwamba ne: “Mukalenge nguvwa mufile, ne Mukalenge ngwàngàci, Dìna dyà Mukalenge dibèneshiibwè!”

51 Mpindyewu, Sàtaanà wàkabànda kumpàlà kwà Nzambi, bwalu ùvwa mwà kulwa kumpàlà kwà Nzambi, ne kufùnda beena Kilistò (anyi, beena kwitabuujà) dîbà dyònsò. Pa nànkù

kufundayè Yobò ne bintu byàbùngì, ne kwambayè ne “Yobò, cìvwà cyènza ne yêyè àkwacilé Nzambi mudimu, mbwalu byònsò bìvwà byènda bìmpè bwèndè yêyè.” Kàdi yêyè ne: “Bu Wèwè ànu mwà kuswà bwà mèmè kumwangata, mu byanza byànyì, s’nèmmufikishè ku diKwela mulawu muKutàngile mu mpàla.”

<sup>52</sup> Ndi muswè bwà nwènù kumòna dyeyemena òvwà naadi Nzambi mu mwena kwitabuuja. Nwamònu anyi? Yêyè ùdi. . . Mu ngaakwilù mukwàbò, Nzambi wàkambila Yobò. . . anyi kwambila Sàtaanà, nùnkù ewu: “Kwèna mwà kucyènza to! Yêyè mmuntu mwakàne mubingìshìbwe. Yêyè’s mmuntu mwìmpè. Yêyè. . . kakwèna muntu bu yêyè pa buloba bujimà to.” Èyi muntu kaayipu’s wè; bwà Nzambi Yêyè mwìnè wàmbila mwena lukunà Wèndè ne: “Musadidi Wanyì mmupwàngàne bikolè, kakwènakù muntu mukwàbò pa buloba bu yêyè to.” Kaa! Bu twètù ànu mwà kwikala muntu wa mùshindù awu’s wè! Bwà Nzambi wàmòna mwà kutùpèeshakù dyeyemena adi! Bàdi bamanyè ne katwàkulaluka ku Dîyi Dyèndè anyi Bumùntù Bwèndè to, mu mùshindù kanà wònsò! Kushààla ànu menemene, ne Yêyè ùdi mwà kutèeka dyeyemena Dyèndè mu twètù.

<sup>53</sup> Mpindyewu, Yobò ùvwà muntu wàkangata mèyì matùma à Nzambi ku dileetà, menemene. Nè Sàtaanà ùvwà mumanyè aci, kàdi yêyè wàkamba ne: “Bu Wèwè ànu mwà kundekela bwà mèmè kumwangata, s’nèmmufikishè ku diKwela mulawu muKutàngile mu mpàla.”

<sup>54</sup> Ki Nzambi kumwambilaYè, kwambaYè ne: “Mpindyewu, yêyè ùdi mu byanza byèbè, kàdi kwàngaci mwoyi wèndè to.” Ki Sataàna kwela cidya cile ne mwèndè mwònsò mwab’awu. Kwangatayè mulundà yònsò, ne cintu cyònsò cìvwàye naaci, pàmwè ne mwoyi wèndè mujimà, kàdi kàvwà mwà kwangata mwoyi wèndè to. Kàdi Yobò ùvwà ànu kacya wàkwàta, kakùvwà dyalukila dyà cyànyimà to.

<sup>55</sup> Nudi numòna’s, pàdi mulùme anyi muntu mubwàlèku cyà bushùwà mu dipetangana ne Nzambi, ne diitabuuja dishùwashùwàlè adi, dibuulula dyà nè: “Nzambi ùdikù!” Kakwèna cintu nànsha cìmwè, musangu nànsha ùmwè, mwaba nànsha ùmwà, cìdiku mwà kutàpulula muntu awu nè Nzambi wèndè to. Ngèèla meeji ne ùvwà m’Pòlò wàkamba nè: “Kakwènakù ní ndikòkangana, ní nzala, ní njìwù mikolè, anyi bifukùibwà byà mwoyi, anyi lufù, anyi ní ncinyì cyònsò cidì mwà kutùtàpulula ne dinanga dyà Nzambi didi mu Kìlistò Yesù to.” Wèwè udi mwelè lwongò mu Yêyè mu dikùbiibwa bwalu uvwa mulongolola bwà Mwoyi awu.

<sup>56</sup> Kàdi Sàtaanà wàkeela meeji ne ùvwà mwà kumukòndakaja ndambù, nè kumubàngula mapì, nè kumufikisha ku dicyènza. Kàdi, nudi numòna’s, Yobò mwikàle ne dibuulula dyèndè dipwàngàne dyà kùdi Nzambi, nè dyà nè Nzambi Uvwà Nganyì adi, nè mùvwà Nzambi mumunangè, wàkindila’s! Maalu àvwà

ènzekà nànsha miikàle bìshi, wàkindila bwà diitabuuja dyèndè kushindikiibwadi, bwalu ùvwa mukwàtà Nzambi, dibuulula. Dìmvwà mwambè makèlèlè dilòlò adi.

57 Mpindyewu, pàdi babèèdi bàdi mu nzùbu emu, bantu bacìbùkile panshì, anyì nwènù bàdi ne dijinga dyà Nzambi abu, paùdi mwà kupeta dibuulula dyà mùshindù awu dyà ne udi “mubingìshìibwe,” paùdi cyà bushùwà mubingìshìibwe mu dilòmba dyà cintu cyùdi ulòmba aci, nè wítabuuja nè “Yèyè m’Mufuci wa aba bàdi bàMukèba nè lukunukunu,” kakwèna cintu nànsha címwè cidi mwà kukutàpulula ne diitabuuja didi dyelè lwongo kùdi wèwè adi to. Nwamònu anyi? Kàdi, dyàmbedi, didi ne cyà kwikala dikubulwila.

58 Muntu kampànda mmulwè àbìdi aa, kasùmbù kàà bantu, bàmwè bàà kùdìbo bàdi munkanci mwà kutèèleja dilòlò edi, kàdi kungambilayè, wàmba . . . Mvwa ànu ngènzà kubàmbila ne: “Ndaayi ku Kentucky, mpiitùloolù ùdi kuntwaku.” Mvwa mumanyà ne ùvwaku, mvwa mucimòne mu cikèèna-kumòna.

59 Èè, Mwanèètù Demos ne bakwàbò abu kabàakaya to mukùngùlù mule. Paanyimà, ndekeelu wa byònsò, kwambabò . . . Paanyimà pàà Texas mumanè kubwela. Ki kwambabò ne: “Mpindyewu netùpwekè.”

60 Mémè nè: “S’bivwa bikèngela nwènù kwikala bayè kùkaadi mukùngùlù mule.” Kàdi bòbò kabààkenza nàнку to.

61 Demos kwambayè nè: “Ndi mwènzè cilema cinène mu cyòci aci, pa kubènga kucyènzà, Mwanèètù Branham.”

62 Mémè nè: “Bu nè nuvwa bayè kuntwaku, nùнку’s nudi bamupetè yònsò.”

63 Èè, kabàvwa baswè kucitèèleja to. Pashiishe cyà kumpàla . . . pashiishe kumpàla kwà twètù kuumuka dilòlò adi . . . Mwa—mwaba mwìnè wutùvwà tudiila cyàkudyà cyà mundaamuunyà awu. Nyumà Mwimpè kundeejayè mutanta munène mu buloba, ne mu wòwò awu mùvwa mùle tètè ne mpiitùloolò, kàdi mikwàbò yìvwà mipòngòlòkèlè panshì mu Kentucky eyi yìvwà ànu mishimi mikesè yà mpiitùloolò yìvwàbò bàkòkamù ne mpompì, kàdi ewu wòwù ùva mufùmine ku mushimi munène. Ki mémè nè: “Mwanèètù Demos, ùdiku.”

64 E kuyabò bènda bàmwèkèba. Kwambabò nè: “Pwekakù bwà ùtwambilè kùvwà ci—ciinà cyà mpiitùloolò cisanganyiibwa’s.”

65 Mémè nè: “Kaa, to! To! To!”

66 Nwamònu’s, katwèna tukwàta mudimu ne dipà dyà Nzambi bwà kwenda mushinga to. To! To! Yèyè ùvwa mwà kungambila mwaba ùvwàyi, kàdi mémè ncyèna nendè dijinga nànsha dìmwè to. Nciwva mene mufwànyìne kwikala ne diitabuuja dikùmbàne bwà kuMulòmba to. Nwamònu anyi? Bu ne mvwa ne dijinga dyèndè, ngèèla meeji ne bu mémè mwà kuMulòmba, Yèyè mmufwànyìne kungambila. Kàdi dyàmbedi, udi umòna’s,

tubingilà twèbè ne twipàcilà twèbè bìdi ne cyà kwikala bijaalàme. Bikèngela wikalè ne tubingilà bwà cyôci eci. Nzambi kèna ùkupèèsha bintu abi ànu bwalu udi ulòmba to. Nènku kwèna mwà kulòmba mu diitabuuja pàdiku kakùyì kiipàcilà kalelèlè bwà cyôci aci to, bwà kusanganyibwa mu diswa dyà Nzambi. Nwamònu's, wèwè muswè kwikala musàngàle, cyûdi muswilè kwikala musàngàle ncinyi? Nwamònu's, wèwè muswè kwondopiibwa, mbwà kabingilà kaayi bùdi muswè kwondopiibwa? Cyûdi wambila Nzambi ncinyi? Cyûdi muswè kwenza ne mwoyi wèbè pawòndopiibwà ncinyi? Nwamònu's, bikèngela kwikalè . . . bikèngela wikalè ne kabingilà ne kiipàcilà, ne bìdi bikèngela bwà kwikalatù tujaalàme bilondèshile diswa dyà Nzambi. Nènku dîbà adi ke pàdi diitabuuja dikubulwidiibwa, ne Nzambi ku ngàsà Wendè mudìshikàmìne ùdi ùtèèka diitabuuja adi muntwamu, dîbà adi's nkujikè. Nwamònu anyi? Mpindyewu nwamònu anyi?

<sup>67</sup> Mpindyewu, bwà kuvwija Dìyì adi dilelèlè, pàakapwekà bânà bèètù abu kuntwaku, bàakapeta . . . mulùmyànà kampànda kuyayè kuntwaku e kusumbayè cisùmù cyà bintàkanyi, ne kusumbishayè mikàndà yà contrats, ne kwibilayè mukwàbò mùshindù èwù. Mémè kwamba ne: “Udi umòna's, kabyàkukùmbanakù to.” Mpindyewu ànu bwà kuvwija *cipròfetà* aci cyà bushùwà, mu ntàntà wa mètres makumi àsambòmbò ne mwaba ùvwà bantu aba munkaci mwà kuumbula ciinà cyàbò awu, muntu kampànda kupetayè mpùmbe munène wa ùfùkuka. Nènku cìdi kuntwaku, bipànza cinunu ne lukàmà ku citùpà cyà ditùkù, anyi cintu kampànda anyi cikwàbò cyà mùshindù awu; ciikàle ànu cìmupàtula, ànu lwà mu mùshimì munène amu. Kàdi ànu bwà kukùmbaja cipròfetà, Dìyì dìvwà dyambiibwe bwà ne cìvwakù, cìvwakù. Bikwàbò byònsò pàmwè ne byònsò bikaadi bikàmè, myaba yònsò mu Kentucky mujimà amu. Tuumajiba tukesè, bàkatùkòka ne mpompì cipòlò cikesè, tùmbe tükàmà. Cìdi ànu difùkuka dyà dyùmukila ku *dyòdi edi*. Nwamònu anyi?

<sup>68</sup> Kàdi, ànu bwà citù cyàkabwelàmu, twipàcilà tùvwà tubì, e kutwàbo byàlè ku mabèji bùngiwù bàmba ne: “cìvwa cìvwànyìne kwikala mu mùshindù *ewu*,” pààbò balayè nè nebàcyènzè bwà Bukalenge bwà Nzambi, kàdi bìdi ànu bimwèka bu ne mbwàbò bòbò biinè. Nwamònu anyi?

<sup>69</sup> Nènku kabyàkukùmbanakù to, cintu cyà citù nànsha cimwè kacyàkukùmbanakù to. Tubingilà twèbè ne twipàcilà twèbè bìdi ne cyà kwikala ànu mu byòbì menemene, dîbà adi udi nè diitabuuja, bwà kulòmba. “Piikalà myoyi yètù kayiyì yitùpiisha to, dîbà adi tudi ne dyeyemena.” Nwamònu anyi? Nwamònu's, bikèngela twikalè ne dyeyemena. “Ndi muswè eci bwà luumù ne butùmbi byà Nzambi.” Dîbà adi diitabuuja dìdi nè—nè kajila kàà kubwelamù; kabiyì nànkù to, dîbà adi udi ne diitabuuja dyà mu mutù, dyà mamanya à mu mutù, kàdi kadiyì diitabuuja dishùwashùwàlè dyà kùdi Nzambi to. Diitabuuja dyà mamanya

à mu mutù adi kadyèna nè kwàkufikishàdi nànsha. Ndifwànyine kukupèèsha disaluka, kàdi kadyàkukupèèsha dyondopa dyùdi ukèba adi to.

<sup>70</sup> Pa nàнку, Yobò, pàvwàye munkaci mwà kudikenketa ne diitabuuja dishùwashùwàlà divwà Nzambi mumupèèshe ne yèyè ùvwa “mwakàne adi,” dyà ne ùvwa mwenzè cintu cyònsò civwà Nzambi mumulòmbe bwà yèyè kwenza aci. Mpindyewu patwàya bwà kutùsambidilabò, bwà mabèèdi ètù, ndi ndikonka ní tudi benzè byònsò bìdi Nzambi ùlòmbe bwà twètù kwenza abi. Tudi balondè katòba kònsò kàà Mufundu anyi? Tudi baMupèèshe myoyi yètù ne nsòmbebu bwà mudimu anyi? Cyùdi muswilè bwà wèwè kwondopiibwa ncinyi? Ki bwà cinyi kanwèna mwà kupeta diitabuuja búngi bukùmbàne to, nwamònu's, bwalu kwèna pàmwàpa mwenzè cintu eci kùdi Nzambi nè meeji matòoke ònsò byùmukila munda mwà mwoyi wèbè nànsha. Mwàkènzà Hezèkiyà amu, kupeesha Nzambi kabingilà, mwàkaswàye bwà kutèeka bukalenge bwèndè—bwèndè mu bulongàme. Ki Nzambi kwaluja mupròfetà Wendè nè kumwambila, nè yèyè neòndopiibwè. Nwamònu anyi? Kàdi, bikèngela wànji kwikala mulongòlòla bintu abi, dyàmbedi.

<sup>71</sup> Pa nàнку paùdi ànu ufika mu myaba eyi nè umanya nè ncikubuulwila kùdi Dìyi dyà Nzambi, ku dibuulula, ku Dìyi didi Nzambi ùkulòmbe bwà wèwè kwenza, díbà adi udi ne diitabuuja, diitabuuja dishùwashùwàlè.

<sup>72</sup> Mpindyewu, ànu mùvwà Abraham pàvwàye ne bidimu makùmi citèemà ne citèemà apu. Ngèèla meeji nè, mmu Genèsè 17. Nzambi wàkamwènekela muntu mukùlákàji ewu, mpindyewu, nè bidimu makùmi citèemà nè citèemà, pàkaavwàye ne bidimu biipacila ku lukàmà, mwikàle mwindila mulayi awu munda mwà bidimu byònsò ebi. Yèyè wàkamumwènekela mu dìnà dyà *El-Shaddai*, “Wa mabèèle awu.” Kàdi ndikànkamika kaayi divwàci's wè, kàdi mulayi kawùvwa mwànji kuula musangu awu to. Kàdi: “Abraham, Mèmè ndi Nzambi wa Bukolè bwònsò, *El-Shaddai*, ‘mufidi wa Dikàndà, Nzambi udi nè Mabèèle.’”

<sup>73</sup> Ànu mûngánwàmbidi kumpàla amu, mùdi mwànà mukesè wa mu dibòkò udi ulubakana awu, ne mwikale ùsaama, ùdila mwadi, nè mulàale mu cyàdi cyà mamwèndè. Ne mwikàle wàmwina dikàndà dyèndè kùdiye, bwalu mmusànkishiiibwe pàdiye munkaci mwà kwamwa apu, bwalu mùshindù ùmwèpelè ùdiye nawù nè ùdiye mumanye ndibèèlè dyà maamù adi. Kí mmumanye bwanga bwà dinwà to. Udi mufwànyine kumupà bwanga bwà dinwà, mmufwànyine kwela mbilà nè kudila mwadi. Kumutwà lushingì mu dibòkò, mmufwànyine kudinyènga. Mùshindù ùmwèpelè ùdi mwà kumusànkisha ndibèèlè dyà mamwèndè.

<sup>74</sup> Ki Yèyè kwamba ne: “Abraham, wèwè ukàadi mununu,

bukolè bwèbè mbumanè kuya, mabòkò èbè mmafùbìdile, bwàna bulùmè bwèbè mbumanè kuya, kàdi mèmè ndi Mamwèbè. Shààla wèwè mukwàte bikolè ku mulayi Wànyi, ne ikàlà musànkishìibwe paùdi munkaci mwà kwindila apu. Shààla mwikishe!”

<sup>75</sup> Mpindyewu, awu ke mùshindù ùdi mwena kwitabuuja yònsò, nànsha bàmba ne nkànsèrè kabi kàà bìshi kaùdi naakù, mmukùngùlù bule kaayi ùwà musòmbe mu kàkalu kàà balèma, nní ncinyi cyònsò cyà ku bintu abi, bu wèwè ànu mwà kushààla mukwàte ku dibuulula dya kùdi Nzambi adi ncyoncyoncyo! Dìbà adi ikàlà musànkishìibwe, mumanyè ne necyènzekè, bwalu diitabuuja didi dindile ne lutùulù lwònsò mulayi awu. Nwamònu anyi?

<sup>76</sup> Yobò ùwà mumanyè ne yèyè ùwà mubingè. Patùdi tujandula, mu Mifundu emu nè, kùvwa...balùmyànà aba bàvwà balwè kùdiye; bidimba byà mu èkèleeziyà wendè. Bintu byònsò bìvwà musangu kampànda byà mushinga kùdiye bìvwà bimukùdimùkile, nè bàteeta kumufùnda nè ngènzàmpèkààtù wa mu musokoko, bwalu bintu byònsò ebi bìvwà bimwenzèkèlè. Nudi nuumvwa bantu, kàbìdi leelù ewu, bàmba ne: “Mèmè’s nkàadi munwàmbile. Mutàngilaayi! Nudi numòna cidi...?” Aci kaciyèna ànu bulelèlè menemene to. Misangu mikwàbò Nzambi ngudi uteeta cisàmbà Cyèndè. Mu ebu bwalu, ùwà n’Nzambi ùteeta Yobò, muntu mutàmbe bwìmpè uvwakù pa buloba mu cikondo aci. Mpindyewu, Yèyè ùwà mumukwàte pa dìbà adi, bwalu Ùwà mumanyè ne Yobò ùwà mupròfetà uvwa ne cikèèna-kumòna cyà kùdi Nzambi, bwà nè yèyè ùwà mwenzè ànu menemene cìvwà Nzambi mumwambile bwà kwenza nè yèyè...Nzambi ùwà mwenzèjìibwe bwà kushààla mulamè mulayi Wèndè kùdiye.

<sup>77</sup> Kaa! Bikèngela bwà beena Kilistò bònsò bìikalè nànkù. Cikondo cidi mvità yà ndekeelu yà mwoyi wètù yilwa, ne lufù lùtuuta cyonà pa muminu pètù, tudi ànu ne cyà kushààla bakwàte bakwàcilemù nè kuvùluka nè Nzambi mmwàmbè nè: “Nènkujuulè cyàkàbìdi ku ditùkù dya ndekeelu.” Nwamònu anyi? Bikèngela nùlamàayi aci—aci, bujaadiki bwètù, mwaba wètù mu Kilistò, kaaba kèètù, citùdi aci, bamanyè ne tudi balamè Dìyi dyònsò dya dìyi Dyèndè ditùma. “Bàà dyàkalenga ng’aba bàdi bènza mèyi Èndè matùma bwà bààmònakù mwà kupeta bukenji bwà kubwela.” Nwamònu anyi? Ne patùdi bamanyè ne, nànsha ní nganyi ní nganyi mwàmbè cinyi, tudi balàmè dìyi dyònsò ditùma ditùdi tumòna mu Bible, cidi Nzambi mutwènzèle...mutwàmbile bwà kwenza, nè kaneemu kààbùngì, nè dinanga, nè kuneemeka kùdi Mufùki Wàkafùnda Bible awu.

<sup>78</sup> Tudi twamba nè: “Muntu ngudi muCifunde.”

<sup>79</sup> “Bantu bàà kale, basàka kùdi Nyumà Mwìmpè,



mbààkaCifùnda.” Nwamònu anyi? Nwamònu’s, Nzambi wàkaCifùndila kùdi muntu. Bu mùdi mupròfetà wamba Dìyi Dyèndè, kî n’dìyi dyà mupròfetà to, n’Dìyi dyà Nzambi, nwamònu’s, ku mupròfetà. Kî bwà cinyi Cìdi ne cyà kwenzeka, pìikalàCi bushùwà menemene Bulelèlà.

<sup>80</sup> Mpindyewu, tudi tumòna muntu munène ewu. Nènku, vùlukàayi ne, Yobò kàvwa ne Bible wa kubala mu ditùkù dyèndè to. To! Yèyè wàkalonda ànu disonsodiibwa. Ûvwa mupròfetà uvwa Dìyi dyà Mukalenge dilwa kùdiye. Bìvwa—bìvwa bikèngela ànu bwà yèyè kwikala musonsodiibwe, bwalu ùvwa mumanyè kaaba kèndè ne yèyè ùvwa mupròfetà wa Nzambi. Mpindyewu, cintu cimwèpelè cìvwa ne cyà kwenzeka, cìvwa mbwà disonsodiibwa kumulengadi. Nè pashìshe kumanyayè cyàkambayè ne necyènzekè, bwalu cìvwa nku disonsodiibwa.

<sup>81</sup> Ki cyòci aci cìdi èkèleeziyà, pìikalàci mu bulongàme (citéekiibwe mu bulongàme), cìdi ànu...cìdi ne byamù bilamakaja tàyàdi, cìdi cìkèngela dìbà adi ànu bukòlè bwendeshi. Dilòòlò edi, bu twètù mwà kulongolola byamù bilamakaja, kulongolola myoyi yètù mu mùshindù mujaalàme, bintu bitùdi mwà kwenza, londàayi Dìyi dyònsò, ùMulonda mu dibàtiiza, ùMulonda mu ndongolwelu ne ndongolwelu yònsò uvwaYè mutwàmbile bwà kwenza awu, kulongolola cyamu cyònsò cilamakaja, ne kwimana mwaba awu; nènku tudi tàyàdi bwà bukòlè bwendeshi bwà kuteemesha, nènku Nzambi nkàayèndè ngudi bwà kucyènza; nènku aci nkupòngòlwela mu mwoyi wèbè diitabuuja adi didi dyamba nè: “Mpindyewu ndi mwondòpiibwe.” Dìbà adi kabyèna bishintulula cìdi maalu àdi ènzekà nànsha, udi mwondòpiibwe nànsha bishi; bwalu ndiitabuuja, ku diitabuuja nkùdi mwondòpiibwe.

<sup>82</sup> Yèyè ùvwa ne kajila kàà diyiikilangana nè Nzambi, kàvwaye mupetè ku disonsodiibwa. Ûvwa nè mùshindù wà kudipàtula, nè kulekela Nzambi ùbwela. Ne ùvwa mumanyè nè ùvwa mubingishiibwe. Dìvwa ndipà, dìvwa ndipà bwà bantu; kabìyi bwà Yobò to, kàdi bwà bantu. Ke cìdi mapà ònsò à Nzambi, bwà kusadila naawù cisàmbà cyà Nzambi. Muntu yònsò kî mmulongolwela bwà kwikala mupròfetà to. Kî nnwènú bònsò. . .bàdi balongolwela bwà kwikala nusambidila babèèdi to. Bònsò bwàbò kî mbalongolwela bwà kwikala baampaasàtà to, nè bikwàbò. Kàdi nkajila kàvwa Nzambi mubàkàngwile. Nènku bìdi bu mutùvwa balongè mu dindà emu mu dileesonà adi ne, yèyè. . .Muntu nànsha umwe kènà ne cyà kulaluka kukabwela mu kajila kàà muntu mukwàbò to, nànsha yèyè musonsodiibwe bishi, nànsha bìmwèka bishi, nànsha byòbì bilenga bishi. . .Mbanganyi bàvwàku mu disangisha emu mu dindà emu? Tùmonebi cyanza cyèbè. Nwamònu anyi? Nwamònu’s, kwèna mwà kucyènza to.

<sup>83</sup> Ki Davidi nyèyè awu, ànu musonsodiibwe ne mwèndè

mwônsò, bantu bônsò munkaci mwà kwela mbilà ne bàtumbisha Nzambi, bwà kabingilà kàvwà kàmwèka menemene Mufundu, kàdi kàvwa muntu udi ukèngela to. Nùнку dionsodiibwa adi òvwà ne cyà kwikala dilwè kùdi Natàna, kî n'Davidi to. Nwamònu's, yèyè kàvwakù nànsha mukonke Natàna to. Nudi numòna cyàkenzeka anyi? Nwamònu's, tudi ne. . . Nzambi mmwâmbè ne Yèyè “kêna wenza cintu nànsha cimwè pàdiYe kàyi muCibuulwile basadidi Bèndè bapròfeta to.”

<sup>84</sup> Ne Yobò ki uvwa mupròfeta mu ditùkù edi. Mpindyewu, cintu cimwèpelè cívwa Nzambi mwenzèle Yobò: Neyòci ncitu misangu yònsò cimupà lungènyi nè Dìyi Dyèndè nè dionsodiibwa, kàvwa mwà kupeta dionsodiibwa nànsha dikese to. Kàdi òvwà mumanyè byamu byèndè byònsò bilamakaja (òvwà mufile mulàmbù mwosha, òvwà mwènzè cintu cyònsò cívwaye mumanyè ne cívwa cìmpè bwà kucyènza aci), kàdi kàvwa mwà kupeta dìyi kùdi Nzambi nànsha. Kàdi dyabùlù kàvwa mwà kumunyungisha to! Ki bwalu mbwòbù abu's.

<sup>85</sup> Mpindyewu, ki bwalu mbwòbù abu's pàdibo bakusambidila. Kabyèna bikèngela bwà wèwè kwalukila mu mulongo kampànda, anyi kuya bwà muntu mukwàbò kukusambidilayè to. Pàdi mumanyà nè udi mwènzè ànu menemene cidi Nzambi mukwambile bwà kwenza, wamònu's, dîbà adi indilà bwà kajila kàà dionsodiibwa aku kukukàngukilakù, ne: “Mpindyewu ndi mwondòpiibwe!” Pàdidi dìmata mù, dîbà adi kwònsò nkumanè kujika. Kaa, kabyèna bikukèngela milongo yà babèedi, anyi cintu cikwàbò nànsha, kwònsò nkumanè kujika! Ncikubuulwila wèwè! Nwamònu anyi?

<sup>86</sup> Ànu mùvwà mupròfeta mununu ku dilwa dyà Mukalenge Yesù amu, tudi tusangana ne cyàkabuuludiibwa kùdiye, mwena meeji mununu awu, ne: “yèyè kàvwa mwà kumòna lufù to too ne pààmònaYe Kilistò wa Mukalenge.” Nè yèyè wàkaCiitabuuja, ne wàkaCiindila. Ki bantu kwelabò meeji ne mmupàle, mukulumpe awu òvwà mujimije lungènyi. Kàdi yèyè òvwà ànu ùCiitabuuja! Cintu nànsha cimwè kacívwa mwà kumutùùla ku Cyòci aci to, òvwà mumanyè ne Nzambi nguvwa mumubuulwileCi, bwalu Bible mmwâmbè ne: “Cyàkamubuuludiibwa kùdi Nyumà Mwimpè.”

<sup>87</sup> Simèonà kubwela mu Ntempèlù mu kasunsa aku, kuyayè tàmakàtàmakà e kutumbishayè Nzambi, kwambayè nè: “Lekèlà musadidi Webè àye byàndi mu ditalala.” Pàakambulàye mwànà wa mu dibòkò awu ne: “Mèsù àànyì àmònu Lupàndù Lwèbè.” Nwamònu's, yèyè òvwà mumanyè ne òvwà mwà kuCimòna. Nànsha bàmba ne mbànà búngi kaayi bàvwàye mwà kamòna ditùkù dyònsò, òvwà mumanyè ne Nzambi ùkaavwa mumubuulwile ne òvwà ne cyà kumòna Kilistò kumpalà kwà kufwàye. Simèonà òvwà mwitabùùje nàнку.

<sup>88</sup> Mpindyewu pàdici *cikubuulwila*, bwà ne wèwè mwìnè

wâpecì mulayi wà Nzambi; disonsodiibwa, nwênù bu beena Kilstò, dyâkulengi, kabyèna mene bikukèngela mulongo wà babèèdì to. Cintu...cintu cìmwèpelè cìdì cikukèngela cìdì mmwoyi muunzulula pàdì byamu bilamakaja byònsò tàyâdì, kàdi kulekela disonsodiibwa dibwelamù, ne dîbà adi cintu nànsha cìmwè kacyèna mwà kushintulula mmwènenu webè to; udi naaci. Pa kuumusha aci, kacyàkwikala ne dikwàcisha nànsha dikesè to.

<sup>89</sup> Mpindyewu mònaayi nè, Yobò ùvwa dijinga ne kajila kàà disonsodiibwa, ùvwa naakù kakàngula. Yèyè ùvwa nè kajila kàà kuyiikilangana ne Nzambi, ku disonsodiibwa Dyèndè. Yèyè ùvwa ne mùshindù wà kudyumusha yèyè mwinè nè kulekela Dìyi dyà Nzambi dibwela. Tàngilàayi mùvwàbo—mùvwàbo bàlwa kumukonka maalu bafùmìne ku Esètè ne ku Wesètè, bantu bamwindile bwalu mbamanyè ne cìvwà Yobò mwâmbè cìvwa Bulelèlè. Bàvwa bamanyè ne muntu awu ùvwa wàmba Bulelèlè. Bwalu, cìvwàye mwâmbè mu cipròfetà aci, ke cyàkenzekà! Nè pa nànkù bantu kufùmìna ku Esètè ne ku Wesètè.

<sup>90</sup> Wàkamba ne ùvwa mwà kuya mu bisalu, bânà bàà mfùmù batekète bàvwà bafùmìne ku Esètè abu bàvwa mwà kwìnama kumpàlà kwèndè, ànu bwà kuumvwa dîyi dimwè dyà busàmbi kùdiye, lungènyi lwèndè lunè ne lwà bukolè alu, bwalu bàvwa bamanyè nè muntu awu ùvwa wa kweyemena. Kàvwa muswè kuditàmbisha yèyè mwinè to, kàvwa ùkèba luumù lwèndè yèyè mwinè, kàvwa wènzeja bantu maalu ku bukolè nànsha, yèyè ùvwa ànu mupròfetà wa kweyemena kumpàlà kwà Nzambi. Nènku bàvwa nè dyeyemena kùdiye, nè bantu bònsò bafùmìna ku Esètè nè ku Wesètè ànu bwà kwakulakù nendè mu katanci kakesè cyanààna. Yèyè mmwakule bwà bwalu abu, mu Bible emu. Kàdi, nudi numòna's, yèyè ùvwa mupangile disonsodiibwa bwà kumwambila ne byònsò ebi bìvwa ncinyi. Nzambi wàkabilekela byènzeka, kàakamwambila to.

<sup>91</sup> Pashiishe, dîngà ditùkù, tudi tujandula nè mu cyôci aci, ki dîbà ndyôdì adi didì...Bantu bònsò, pawùdì ànu mwà kubàkwàcisha: “Mbìmpè.” Kàdi pàdìbo baswè kubènga kupetangana neebè ku mèyi, dîbà adi ke didì lutàtu lùbwela. Kàdi yèyè nkàayèndè ùvwa mumanyè ne ùvwa mubingè; dituuta dyèndè dyà diitabuuja, dyà kuumvwa Dìyi dyà Nzambi dyàkula nendè, ùvwa mumanyè ne Cìvwa Bulelèlè. Èyowa's, mukalenge! Yèyè ùvwa mumanyè Dìyi dyà Nzambi. Muntu nànsha umwe kàvwakù mwà kumutàtakaja ku Cyôci aci to, bwalu ùvwa muCìmanyè. Cidi...Kàdi dîbà dyònsò dyùdì... pàdì cintu kampànda cikubuulwila, pàmwàpa cibèngangana ne cìdì bantu bèela meeji...Mpindyewu, ndi ngàakula mu mulongo wà bapròfetà. Pàdìbi ne Nzambi ke udi ubuulula cintu kampànda, cyà ne, kwòkò kwikale mùnsokòntù ùdì ùfùmìna kùdì Nzambi bwà kumanyishiibwa kùdì bantu, kacyàdyàkulwilakù ku sèminère nànsha, kacyàdyàkulwilakù ku

kasumbù kàà bantu nànsha, kacyà kacitukù cyenzèke nànkù nànsha. Necyènzekè misangu yònsò, ke mùdici cyenzèke, nè necyènzekè, kupicila ku muntu-nkààyà umwèpelè, mupròfeta kampànda! Amòsà 3.7, nwamònu's: "Mukalenge kèna wènza cintu nànsha cimwè pàdiYe kàyì mwanjì kuCibuulwila kùdi bapròfeta Bèndè to."

<sup>92</sup> Nènku, mpindyewu, Yobò ùvwa ne cintu kampànda cìmutàcisha, kàdi kàvwa mwà kupeta disonsodiibwa to, nènku cìvwa cìmutàcisha mu meeji, nènku aci. . . paùdi ubwela mu lukutukutu lwà mùshindù awu alu, ke díbà adi dídi mwena lukunà ùbwela mu mulundà yònsò, pàmwè ne yònsò, ùtu nendè. Kàdi ki kubangabò kumubanda. Kaa, cìvwa ne cyà kwikala cintu cyà dikènga dikolè bwà kumanya ne balundà bèndè mene ke bàvwà bàmubanda ne maalu, Sàtaanà díbà adi ùdi ùya ùkadisanga yèyè mwinè ne mwena lukunà. Apu ke pàdi Sàtaanà ùbwela nè: "Lekèlè mèmè mmupyè, nè mèmè nèmufikishè ku diKwela mulawu Kùdi. . . Nèmufikishè ku divila Mukenji wèndè. Mèmè's nèmufikishè ku diKwela mulawu. Nèmufikishè ku dyalukila wàmba ne 'Cyònsò cìvwa ànu cyà mashimi.'" Pashìshe kumuteetayè nè byònsò bìvwàye mwà kwenza abi, bwà bantu banène bònsò ne balundà bònsò bàvwàye nààbò bàà ciibidilu abu. Kàdi Yobò kushàalayè mutwè makàsà panshi, bwalu ùvwa mumanyè ne ùkaavwa mùmvwè Dìyi dyà Nzambì!

<sup>93</sup> Èyi Nzambì, kwàcishàku, mààlabà dilòlò, mu diyisha dyà *Mapwàpwà À Nkuci* adi. Mèmè kuumvwa Dìyi dyà Nzambì dyàmba cintu kampànda, ne necyènzekè mùshindù awu! Ànu byà mwomùmwè ne mùvwà bikwàbò bintu byònsò ebi byenzèke amu, ke mwènzekàbi!

<sup>94</sup> Mpindyewu, Yobò ùvwa mumanyè ne cìvwa ne cyà kwenzeka. Ne yèyè ùvwa mumanyè ne Nzambì ùvwa mumwambile ne, yèyè ùvwa "mwakàne." Kàdi bóbò bàkamwangata bu ngènzàmpèkàatù, pa nànkù wàkindila díbà adi bwà disonsodiibwa. Sàtaanà mubwèlè mu ba—bantu bònsò nè kuseemenayè pabwìpì nè. . . bamusàmbi, mùvwàbu badyàmba's, kàdi munkaci mwà kumubanda, kàdi aci kacyakamunyungishakù nànsha kakesè to. Kàdi pààkalwà Dìyi dyà Nzambì dishindikìilbwe kùdiye. . . Yèyè ùvwa mùmvwè bààkula bwà Nzambì ku ditèleja nè dicì dyèndè, kàdi díngà ditùkù edi musòmbèle pambèlu mu cipidi citàmbe kupwekeshiibwa. . . Nènku díbà ùvwàye musòmbè mwaba awu, ne bantu bònsò munkaci mwà kumubanda ne maalu, too ne mukàjèndè mene wàmba mùvwàye "mupile," ùvwa munkaci mwà kudìkoonya byùjà byèndè. Ki Elihu ewu pwàà nè ùmutàndisha mùvwàye mudìsu, bwà mùshindù ùvwàye ùbanda Nzambì nè maalu nè bikwàbò.

<sup>95</sup> Ne pashìshe pa diinè díbà adi mpààkamulengà disonsodiibwa, ki pààkabangà mikenyi kwela, mikungulu

kubangayi kukungula, ki pàakatuuatà mupròfetà disonsodiibwa mpòpò apu, ki kujuukayè kuulu, e kwambayè nè: “Ndi mumanyè ne Mupikudi wanyi ùdi ne mwoyi! Nè ku matùkù à ndekeelu Yèyè neimanè pa buloba apa. Nànsha misàndà yà mu dikòba mibùtùle mubidi ewu, nànsha nànkù mu mubidi wanyi nèmmonè Nzambi, Yèyè ungàadimwènà mèmè mwinè.”

<sup>96</sup> Wàkamòna... Ûvwa wàkula bwà mici, mwoyi wà bukwàmici, mùshindù wùdiwu wùfwa ne wùshààla cyàkàbidi ne mwoyi; màyi àdi àwàluja cyàkàbidi, dipembu dyà màyi, mànànanshì à màyi, bipeta byà màyi miikàle àpòngolokela pa mucì kampànda anyi cintu kampànda, dimiinu dyàkayà mu buloba adi. Yèyè kwamba nè: “Kàdi muntu yèyè ùdi ùlààla panshì nè ùkùùla mwoyi, bânà bèndè bàlwa bwà kumuneemeka kàdi kàyì ùcijingulula to. Éyi bu Wèwè mwà kunsokokaku mu lukità” (Yobò 14) “too ne pààpità ciiji Cyèbè cikolè aci.” Yèyè kwamba ne: “Kàdi muntu yèyè mufwè, neikalè ne mwoyi cyàkàbidi anyi? Bikondo byònsò bimana kulongolola byà mwoyi wanyi, nèngindilè too ne pààlwa dishintuluka dyanyi. Wèwè neumbiikilè, ne mèmè nengàdamunè. Udi munkòsèle mikàlù yìndi ncìyi mwà kusambuka to,” ne bikwàbò. Ûvwa mumanye bintu byònsò ebi. Wàkatàngila mwoyi wà mucì, kàdi cyàkenzekelà muntu pààkafwàye ncinyi? Yèyè kàakabiika ku lufù to. Pa nànkù, Nzambi ùvwa ùmuleeja Mupikudi ewu.

<sup>97</sup> Ûvwa muswè bwà kumòna ní kùvwakù muntu kampànda uvwa mwà kumwakwila. Ûvwa mwakwile bantu bààbùngì be, kàdi mpindyewu kùdikù muntu kampànda udi mwà kwakula bwèndè yèyè anyi? Kùvwa kufwànyìnekù kwikala muntu uvwa mwà kutèeka cyaanza pa Yobò, anyi pa muntu mubiipe ne Nzambi wa Cijila, bwà kwenza cilamba bwà njila wa kupicila anyi? Ûvwakù mufwànyìne kuya ku nzùbù Kwèndè ne kukòkola ku ciibi anyi? Ùdikù mwà kunzulula ciibi ne kuyuukila nendè cipòòlò cyà dībà anyi?

<sup>98</sup> Kàdi, dībà adi, pààkamata disonsodiibwa mu mwoyi wèndè, dībà adi ùvwa mwà kumòna Nzambi. Mukenyi ùdi munkaci mwà kwela, mukungulu ùdi munkaci mwà kukungula. Ne pààkenzekàci, yèyè wàkatwà makàsà èndè panshì, ne yèyè wàkamba ne: “Ndi mumanyè ne Mupikudi wanyi ùdi ne mwoyi! Mupikudi wanyi, ne ku matùkù à ndekeelu Yèyè neimanè pa buloba.” Nwamònu’s, ùkaavwa mubangè kumòna dibìnduluka dyà Nzambi ku diitabuuja dyèndè.

<sup>99</sup> Mpindyewu, tudi tudìkonka ní tudikù bafwànyìne kumòna Nzambi. Kùdikù mùshindù wutùdì bafwànyìne kuMumòna anyi? Mpindyewu, ke mùshindù wùmwèpelè wùvwà Nzambi naawù, ùteeta Yobò. Yèyè kwamba ne: “Mvwa mùmvwè bàakula Bwèbè, ne ditèeleja dyà ne dici, kàdi mpindyewu ndi nKumòna. Kàdi mpindyewu ndi nKumòna, ne mèsù àanyi.” Cikèenà-kumòna cyà cidì kacìyi cimwènèka cyàkawijiibwa citòòke tòò. Yèyè wàkamòna divuba dyènda dinyùnguluka, wàkuumvwa

dyela dyà mukenyi, anyi wàkadimòna. Ne kumònayè dikungula dyà mukungulu awu, pàmwápa kwísù kutòòke, ki kumònayè ne Nzambi ùvwa mu ditutu adi ne mu mukenyi awu. Ùvwa mwà kumòna Nzambi, ne mèsù èndè à mubidi awu. Nwamònu's, bwalu cintu cidì kaciyi cimwènèka cyàkavwijibwa cyà cimwènèka. Cìkèèna-kumòna cyà cimwènèka ne mèsù cyà bakwàbò aci cyàkashìndikiibwa cikondo aci, citòòke tòò, bwà dísù dyà mubidi.

<sup>100</sup> Ànu mùdì diitabuujà ne byenzedi, mutwámì makèlèlè dilòlò amu. Abraham, kàyi...kàvwa ne Bible wa kubala nànsa, kàdi yèyè ùvwa mupròfetà, nè cìkèèna-kumòna cyèndè nè diitabuujà dyèndè. Kàdi cyàkamwèka cyà mafi kùdì bakwàbò bwà mùvwàye mwà kwela meeji à mùshindù awu, mùvwàye mwà kwela meeji à ne bàvwa ne cyà kupeta mwànà. Kàdi bàakapeta mwànà awu, bwalu cìkèèna-kumòna cyèndè cyà mwànà ki cìvwàye munkaci mwà kwamba ne: “Nemmùpetè! Nemmùpetè!” Kàdi pààkalediibwà mwànà awu, dìbà adi bantu bakwàbò bàvwa mwà kumòna ne mèsù cìvwàye mumòne mu cìkèèna-kumòna. Nènku dìbà dyùdì udìtwa mu kwenza cyùdì witabuujà mu mwoyi wèbè, dìbà adi bantu bàdi bàmanya Nzambi, ne bàmanya cidì munkaci mwà kukwenzekela aci, ku mùshindù wùdì wenza maalu. Mùshindù awu ki wùdì umòna Nzambi ne mèsù. Kàdi bwèndè yèyè, byònsò bikaavwàye mwènze abi bìvwa bìmpè, byònsò bìvwàye mwenzè bwà bakwàbò, bìvwa bìkèngela muntu kampànda wa kumwakwila. Pààkalwà dilediibwa dyà mwànà awu, Izàkà, disonsodiibwa adi—adi dyàkamulombolà ku cyòcì eci dyàkashìndika cìkèèna-kumòna cyèndè mu mùshindù wà ne bantu bàvwa mwà kumòna ne cìvwàye mumòne mu cìkèèna-kumòna aci cìvwa bulelèlè bwà cyà bushùwà.

<sup>101</sup> Mpindyewu, míngà misangu dituuta dinène dyà diitabuujà edi dìdì dilwa ànu mu cikondo cyà lutàtu. Cidì pa ciibidilu lutàtu lùdì lùtùfikisha ku cyòcì eci. Lutàtu ki lùvwa lusàke Yobò mu cyòcì aci. Mòna's, yèyè's ùkaavwa ku ndekeelu kwà mwoyi wèndè. Bàna bèndè bàvwa bafwè; tuumeelù twèndè. Ne bintu byèndè byònsò bikaavwa biyè ne bibùtùdiibwe. Ne mwoyi wèndè sungasunga, wàkakwàcika byùjà kuumukila ànu ku lusongu lwa mutù wèndè too ne ku bidyacilu byà makàsà èndè. Cìvwa lutàtu, mu mùshindù wà ne wàkadikama yèyè mwinè, ki mwaba wàkamulengela disonsodiibwa ngwòwò awu.

<sup>102</sup> Éyi nwènu balùme nè bakàji, dilòlò edi, bu nwènu mwà kukènzakana ne kumòna mutùdì pabwìpì ne Dilwa dyà Mukalenge. Wèwè udi ulààdikija dibàtiiza dyà Nyumà Mwìmpè awu. Udi mufwànyìne kwikala mweyèmène disaluka kampànda, anyi cintu kampànda cyùvwa mwènzè cidì Sàtaanà mwà kutentula, ne kùyi mwà kupeta Nyumà mulelèlè munda mwèbè bwà kuya mu milayi yà Nzambi yònsò to. Mmunyi mùdiku muntu udi wamba mùdiye ne Nyumà Mwìmpè mwà kuvila Dìyi òmwele dyà Bible ewu, ne: “kí ndilelèlè to?” Kwèna mwà kucyènza to!

103 Nànsha wêwè mwikàle mutèndeledi wa bishi, nànsha wêwè mwikàle wa mu maèkèleeziyà búngi kaayi, nànsha wêwè mwikàle ne dínà dyèbè mu mikàndà búngi kaayi, pìikalàbi ne Nyumà Mwímpè mushùwashùwàle awu ùdi munda mwèbè (cidi ciikàle Diyì edi dimwènèshiiibwe), neumonè Mukenji ne dîbà, bwalu Nyumà Mwímpè ngudi ucyènza. Kàdi kùdi ne cyà kwikala cintu kampànda cidi ne cyà kumuteemesha, disonsodiibwa didi dikulenga. Nènku kwòkò kwikale. . . wêwè wela ànu màyi panshi, wela panshi, wela panshi, kàdi kakùyì dimiinu nànsha dimwè mwaba awu dyàkulengawu, mmunyi mùdiwu mwà kutòlwesha cintu kampànda? Kakwèna cintu nànsha cimwè mwaba awu cyà kutòlwesha to. Mbwena kwamba nè, ànu Basungula bàà Nzambi ki bààCimòna.

104 Basungula bàà Nzambi bààCimòna mu cikondo cyà Noà, mu cikondo cyà Mòsà, mu cikondo cyà Yesù, mu cikondo cyà bàpostòlò, mu cikondo cyà Luther, mu cikondo cyà Wesley, mu cikondo cyà beena Mpenta, bwalu aci cìvwa n'Dimiinu divwà pa buloba dîbà divwà disonsodiibwa edi dipòngòlòdiibwe. Mpindyewu pàdi disonsodiibwa munkaci mwa kupòngolodiibwa apa, bwà kukùngwija Mukàji-musèla pàmwè, ànu aba bàdi Basungula mbààCimòna. Yesù wàkamba ne: “Ndi nKusakidila, Taatù, bwà ne Wêwè udi musokòke bintu ebi ku mèsù kwà beena meeji ne batàlame, ne muCibuulwile bàna bakesè aba mene bàdi baswè kuyiila.” Mpindyewu, disonsodiibwa divwà ne cyà kucilenga.

105 Mpindyewu, dîbà didi disonsodiibwa dimulenga, dyòdi ke dyàkacyènza. Ùvwa Naadi cikondo aci! Mpindyewu, tudi tujandula nè, kùdi kùlwa cikondo cyà ntàtu eyi pàdi dicincimika ditùngunuka apa. Kàdi nudi nukènzakana leelù ewu, tàngilàayi mu ngiikàdilù utùdi ne mwoyi ewu. Twètù katwènakù ne mwoyi mu Sodomà ne Gomòlà yà cyena leelù anyi? Buloba kî mbupingane anyi? Abu's bývwa mbuloba bwà bàà Bisàmbà byà bendè bwàkabutudiibwà musangu awu abu, ku kapyà. Yesù kàakambakù, mu Luukà Munsantu, nshapità wa 17, mvensà wa 28, wa 29, nè wa 30, nè: “Ànu mwàkadibi mu matùkù à Sodomà amu, ki mwikalàbi kàbidi ku dilwa dyà Mwàna wa muntu, pìikalà Mwàna wa muntu munkaci mwà kubuuludiibwa anyi”? Ncinyi cidi “cibuulula”? Mmùnsonkònto ùdi mumanyishiiibwe; nkubuulula anyi kumanyisha mùnsokòntò.

106 Mpindyewu, bintu bìvwà bisokoka mu bikondo byònsò byà èkèleeziyà ebi bìdi munkaci mwà kubuuludiibwa patùdi twakula apa, munkaci mwà kumanyishiiibwa. Mpindyewu, tuvwa mwà kwamba aci, ne bu Nzambi kàyi mubìshindika to, nànkumbyà mafi. Nwamònu's, Nzambi kàtu dìjinga ne muntu bwà kuumvwija Dìyi Dyèndè to, Yèyè m'Mudyùmvwijidi wa Yèyè mwinè. Wàkamba ne: “Virgò neimite difù,” ne wàkiimita. Wàkamba ne: “Bukènkè bwikalèku,” ne bwàkiikalakù. Ne twètù katwèna ne mwoyi mu cikondo cyà Luther, mu cikondo cyà

Wesley, anyi mu cikondo cyà beena Mpenta to. Cikondo cyà beena Mpenta civwa ànu dyalujulula dyà mapà àvwà àpingana ku èkèleeziyà, kàdi tudi ne mwoyi ku dîbà dyà dilòòlò, tudi ne mwoyi mu cikondo cyà dibiikila dyà kupàtuka kwà Mukàji-musèla.

107 Nènku ànu mùvwàbi bikolè bwà beena Kàtòlikè kumònabò Luther, ne bàà Luther bwà kumònabò Wesley, ne beena Mpent-... beena Wesley bwà kumònabò cikondo cyà beena Mpenta, ki mùdîbi kàbîdî bikolè bwà beena Mpenta kumònabò cikondo eci. Bitu misangu yònsò ànu mùshindù awu, bwalu nCipòngòlòdiibwe pa Dimiinu Disungula, ne ànu pa dyòdî nkàâyadi. Aci ke cidi Bible ùlongesha. Kabèèna mwà kuCimòna to, Yesù mene wàkabàsambidila, wàmba nè: “Bàvwa mpofo, kabàvwa bacimanyè to.” Bwàkabuulwibwà ùdi ùtwàmabila, mu cikondo cyà èkèleeziyà wa Laòdikiyà eci, pààkapàtudiibwàYe mu èkèleeziyà, ne bàdi “butakà! bapèlè! beena dikènga! mpofo! kàdi kabàyi bacimanyè to.” Ncyalùkile cyàkàbîdî, kabèèna mwà kuCimòna to, kabèèna mwà kuCyùmvwà to. Mbatàmbe kulamakana bikolè mu bilèlè!

108 Kàdi vùlukàayi Dìyi dilaya dyà Nzambì mukana mwà Yesù Kìlistò, Nzambì mwinè wàkakula bufùki kwikalabò kookò awu Yèyè ki uvwa Ewu wakamba kumpàla kwà difùkà dyà dyulu ne buloba Mèyi awu nè: “Nènku kwikalè,” nè kwikalakù. Bwalu Yèyè wàkamba ne: “Yèyè ùvwa pa buloba, ne buloba bwàkènjiibwa kùdiYe, kàdi bàà pa buloba kabààkaMumanya to. Kàdi bònsò bààkaMumanya àbu, Yèyè wàkabàpèèsha bukòlè bwà kulwa bàna bàà Nzambì.” Mufùki mwinè, ne Mufùki Yèyè mwinè, pààkabiishàYe Lazàrò ku bafwè, Wàkamba ne: “Kanùdyambîdîdî nè eci ncyà pa bwàci to, bwalu dîbà dilwalwa dyà ne piikalà bònsò bàdi mu lukità mwà kuumvwà Dìyi dyà Mwànà wa muntu, ne nebàpatukè.” Nzambì mwinè wàkamba nè “Bukènkè bwikalèku awu,” wàkamba nè, “Dìyi dyà Mwànà wa muntu divwa mwà kubiisha aba bàdi mu lukità.” Cidi ne cyà kwenzeka mu muvù wàci. Yèyè wàkaakula nè: “Kwikalè mulùme ne mukàji,” ne bikwàbò, ne byònsò ebi, mu bidimu nè nkàmà ya bidimu kumpàlà kwà kwenzekaci.

109 Disonsodiibwa dyàkalenga mupròfetà Yeshàayi, kwambayè nè: “Bàtùlelèdî mwànà, mwànà wa balùme wáfidiibu. Dîna Dyèndè nedibîkidiibwè nè Mubedyanganyi, Mfùmù wa Ditalala, Nzambì wa Bukolè, Taatù wa kashidi.” Bidimu kupitabi, ngondo, bidimu, matùkù, mbingu, bidimu kupitabi, nkàmà yà bidimu kupitayi. Bidimu nkàmà mwandamukùlù paanyimà, Emanùwèlè wàkalediibwa kùdi virgò! Bwà cinyi? Mbwalu cyàkambiibwa ku mishiku yà mupròfetà mulaaba maanyi wa Nzambì, dimiinu dyàkapàtuka. Nwamònu anyi? “Nènku dîbà dinène adi,” yèyè kwamba ne, “nudiku baswè kukèba... kuNdòmba Mémè cikèèna-kumòna anyi cimanyinu.”



110 Yèyè kwamba nè: “Nêmbàpèèshè cimanyinu, cimanyinu cyà kashidi: ‘Virgò neimitè difù,’ cimanyinu cyà kashidi.”

111 Mpindyewu, tudi tusangana nè mu mèbà à dilubakana dyà menemene awu, pa ciibidilu ke mùdi Nyumà wa Nzambi ùkwàcilamu mudimu. Yèyè wàkalekela bânà bàà beena Ebèlù abu bàbwela buludì mu cikùtù cyà kapyà, kumpàlà mene kwà kunyungishaYè cyanza. Kadi pàakanyungaYè, Yèyè ùdi ùnyunga.

112 Mpindyewu, tudi tumòna apa ne mu Luukà, nshapità wa—wa 17, ku mvensà wa 30, nè Yèyè wàkamba nè: “Mu matùkù à ndekeelu, Mwânà wa muntu ùvwa mwà kuDibuulula bu mwàkenzàYe ànu pabwìpi ne Sodomà ne Gomòlà, nè ngiikàdilù yimwèyimwè ayi yivwa nè cyà kwikalakù.” Wàkamba bwà Mòsà, bwà . . . nè nwàmfwilaayikù luse, kî mbwà Mòsà to, kadi mbwà Noà. Mùshindù mwinè ùvwa bantu “bàdya, bânwa, ne bikwàbò, bàsèlangana ne basèlesha.” Pashiishe Yèyè kulwa mwaba awu, kwambaYè ne: “Mpindyewu, ànu mwàkadìbi mu matùkù à Lotà, ke mwikalàbi mu cikondo cyàbuuludiibwa Mwânà wa muntu.” Mpindyewu, tàngilàayi, Mwânà wa muntu wàkabuuludiibwa kùdi kasumbù kàà Abraham, bu Muntu, Mupròfetà mu mmwènèkelu wa mubidi wà muntu, Muntu ànu wetù wa patupù ewu mwikalè ne lupwishi ku bilàmbà Byèndè, kadi Abraham kuMubiikila nè “Elohim.”

113 Mpindyewu, Yesù ùdi ùlaya mwab’ewu nè mu matùkù à ndekeelu Mwânà wa muntu neàbuuludiibwè cyàkàbidì kùdi kasumbù kàà mùshindù wùmwèwùmwe awu, Dimiinu dyà bukálengè dyà Abraham adi, ànu pabwìpi nè kapyà aku kumatakù. Vùlukàayi nè, èkèleeziyà kààkapetakù kàbidì ntèmù to, Abraham nè bakwàbò abu kabààkapeta to, mwânà mulaya uvwabò bindilè ùkaavwa mutwàdiibwe dyàkàmwè paanyimà pàà cyòci aci. Ne èkèleeziyà ùdi ùkèba Mwânà Mulaya, Yèyè neàlwe ànu paanyimà pàà matùkù à mudimu wà bwambi ewu, Yèyè neàbuuludiibwè mu maulu. Mpindyewu, tudi tucimòna citòoke tòò, bikèngela cikalè nànkù. Mpindyewu, cintu cimwèpelè cidì cikèngelà bwà kwikalakù ncintu cidì citùtuka, cibwela munda mwà muntu, Nzambi ushindika nè ùmwambila nè ùmuleeja nè ke cintu cidì nè cyà kwenzeka; nè wèwè newikalè mwà . . .

114 Ànu mwàkenza Mòsà amu, kàvwa muswè kusungila bânà abu to, kadi Nzambi wàkaakula nendè mu cipuka civwà cilàkuka kapyà. Kàvwa muswè kuya to, kadi bivwa bikèngela kuyayè. Mòsà ùkaavwa mùmvwe bàmba bwà ne Yèyè ùvwa Yèhowàh munène awu. Kadi dībā adi yèyè ùvwa mwà kuMumòna, Ùvwa mu mmwènèkelu wa Dikunji dyà Kapyà. “Mvwa mùmvwè bàakula Bwèbè, kadi mpindyewu ndi nKumòna.” CivwàYe mumwènèkèle mu ncinyi? Dìyi Dyèndè dishindika.

115 Nzambi wàkambila Abraham ne “cisàmbà cyèndè necisombelè mu buloba bwenyi munda mwà bidimu nkàmà

yinaayi, kàdi Yèyè ùvwa mwà kubàpàtula ne cyanza cyà bukolè.”

116 Nènkù, mònaayi, cipuka cìdì cilàkuka kapyà eci cyàkafila dishindika dyà civwà mupròfetà Abraham mwambe nè necyènzekè. Mòsà kwambayè nè: “Nkààdi múmvwè bwalu abu, kàdi mpindyewu nyèwù mbùmòna!”

117 Mpindyewu, *tudi* búmvwè ne mu matùkù à ndekeelu nè Mwànà wa muntu neàlwe munkaci mwà bantu Bèndè nè kuDìbuulula kùdì bantu mu mùshindù wùmwèwùmwè wàkenzàYe ku . . . kumpàlà menemene kwà kabùtù kàà Sodomà. Mwànà wa muntu, cyàkenzàYe ncinyi? Ùvwa mumanyè mìnsokòntò yivwà mu mwoyi wà Sarah. Yèyè wakafila kàbìdì mulayi kùdì Abraham. Abraham ùvwa múmvwè Diyì dyà Nzambì, ùvwa mufwànyine kwikala muMumòne mu mishindù yàbùngì mishìilèshìilàngàne (Ncyèna mumanyè muvwàYe wàkula nendè to, ku bilòòtà anyi ku bipròfetà), kàdi musangu ewu yèyè wàkaMumòna. “Mvwa múmvwè bàkula Bwèbè, mpindyewu nyèwù nKumòna.”

118 Ne èkèleeziyà ùkaadi múmvwè bàakula bwà Nzambì, mbabalè Bwèndè, nè cyàkenzàYe aci, nè milayi yàkafilàYe ayi, kàdi mpindyewu *tudi* tuMumòna ne mèsù ètù (byà momùmwè menemene ne mwàkamumòna Yobò amu) nè: “Mvwa ngùmvwà bàakula Bwèbè, kàdi mpindyewu nyèwù nKumòna.” Ekèlekèlè! Dishìilàngana kaayipu’s wè.

119 Mòsà, mu lutàtu alu, wàkeela lubilà lukolè. Nènkù *tudi* tujandula, mu Ekèsòòdè, nshapità wa 14, mvnsà wa 13 too ne ku wa 16 nè, Mòsà mu dilubakana dinène adi kuntwaku ne bàna bàà Izalèèlà, dionsodiibwa kumulengadi, ki yèyè kwamba civwà cikèngela bwà yèyè kwamba, kàyi mumanyè ne mmucyambè to. Nwamònu’s: “Shààlaayi biimane bapùwe bwà nùmonè lupàndu lwà Nzambì.” Nzambì kacya kàvwa mwànji kwakula nendè to. Nwamònu’s, dionsodiibwa kàdi kumulengadi.

120 Bòbò kwamba nè: “Udi mutùpàtule mulwè neetù mwab’ewu bwà cinyi? Nùnkù tuvwa mwà kwikala bafwile mu Èjiipitù. Mbwalu kakùvwa nkità kuntu kwàka anyi? Kutùpatula kulwa neetù mwab’ewu, kàdi kutùlekela tufwà; nènkù’s tuvwa mwà kushààla ne mwoyi basòmbe kumaci pòlàà biikàle bapika too ne mutùvwà tufwà, kàdi wèwè kutùpàtula ànu pambèlu apa.”

121 Mòsà, mupròfetà, bu múvwàye mumanyè ne ùvwa nè mùshindù wà kufika kùdì Nzambì, wàkasonsodiibwa, ki yèyè kwamba nè: “Shààlaayi biimane bapùwe bwà nùmonè lupàndu lwà Nzambì; bwalu beena Èjiipitù banùdì nutàngila leelù ewu aba, kanwàkubàmònakù kàbìdì to.” Mmunyi mwàkamanyàye nè civwa nè cyà kwenzeka? Mmunyi mwàkamanyàye? Kàvwa mumanyè civwàye wamba aci to.

122 Kàdi dyàkàmwè paanyimà pàà yèyè mumanè kucyàmba, Nzambì wàkamwambila mwà kucyènza. Yèyè nè: “Mòsà,

kùNgèdi mbilà to, angàtà dikombo dyèbè mu cyanza ùdyolòlè pa mbù, ne wàm빌à bàna bàà Izalèèlà ne ‘Asàayi lwendu!’” Amen!

123 Disonsodiibwa! Mùshindù awu ngùdidi dikulenga paùdi usaama. Mùshindù awu ngùdidi dikulenga paùdi mu lutàtu. Cintu kampànda ncikubuulwila, ne wèwè kumòna ne ncibuulùdiibwe, udi wakula ne díyi dikolè nè: “Ndi mwondòpiibwe!”

124 Díbà adi Nzambì ùdi ùkwambila cyà kwenza: “Juuka kuulu ne asà lwendu.” Amen! Díbà adi kwònsò nkujikè, paùdi mwà kucyènta mùshindù awu. Mùshindù awu ngùdi Nzambì ùcyènta, díbà adi udi umòna Nzambì mumwènèshùibwe mu wèwè mwinè.

125 Nzambì nguvwa mumwambile bwà kucyèntayè. Mpindyewu, díbà adi, bwònsò bàvwàpu abu, Izalèèlà mujimà uvwa kaaba aku awu wàkamòna disonsodiibwa dyàkalenga Mòsà adi. Bàakamòna Nzambì, nè mèsù àbò sungasunga, ùpwidija màyi awu aya ku luseke nè ku lukwàbò. Nènku Dikunji dyà Kapyà adi dyàkabalombola buludi too ne dyàmwàmwà dyà—dyà mbù. Úvwa muumvwe bwalu bwà Nzambì, pashiishe kumònabò Nzambì.

126 Yoshùwà ùvwa mu díbà dyà lutàtu, pàakatanggalakà bilwilu abi, ne díbà dikaavwa dyàmba kubwela. Yoshùwà ùvwa muprófetà, kàbidì ùvwa mumanyè nè bilwilu abi byòbì bipeté ànu mpungà wa kudisanga cyàkàbidì ne bìlwè bwà kumulwisha, ùvwa mwà kujimija bantu bakwàbò bààbùngì, pa nàнку mu cyòci cikondo cyà lutàtu aci díbà divwà cintu kampànda nè cyà kwikala cyenjiibwe. . . Kùdi cintu ànu cimwèpelè, bu yèyè mwà kutungunuka ànu ne kubèèla lubilu, ùvwa mwà kubàlalula, muntu ne muntu, bàpweka. Kàdi kakùvwa bukènkè bùngì bukumbàne bwà kucyènta to, ki Yoshùwà kwimanayè, kwelayè byanza muulu, kwambayè ne: “Wèwè díbà, imànakàna! Nè wèwè ngondo, shààla mulembèlèle pa Ajalònà too nè pangààjikijà mvità eyi.” Ki díbà kushàaladi diimàne tëndé. Kuumvwabò Yoshùwà wàkula, ne pashiishe kumònabo Nzambì, ne mèsù àbò bóbò biinè, mu cyenzedi. Bulelèlà!

127 Nwamònu’s, mu bushùwà bwà bwalu, cívwa ncidikà bwà kumòna cintu kampànda cidì cimwèka kaciyikù mwà kwenzeka to, kàdi pààci cilelèlà. Kàdi: “Díbà dyàkiimana,” mùdi Bible wàmba. Ncyèna mumanyè cidì bantu bèèla meeji to, bàdi bèèla meeji ne buloba bùvwa bunyùnguluka, mpindyewu; kàdi, mu mishindù yònsò, “díbà dyàkiimana tëndé.” Pàmwàpa kacya Yoshùwà kàvwaku mwànji kuteeta bwà kudifwànyikijila mùshindù ùvwaye mwà—mwà kucyènta to, mùshindù ùvwa Nzambì ne cyà kucyènta, cintu cimwèpelè cyàkambaye cívwa nè: “Wèwè díbà imànakàna!” Wàkacyàmba, pàmwàpa kàyi mumanyè cívwaye wàmba to, bwalu Nzambì nguvwa mumupèesheci, nè Yèyè kukwàtayè mudimu.

128 Cintu cìmwècìmwè aci mu Maakò 11.23 ne: “Wèwè mwambile mukùnà ewu nè ‘tentèmùkà,’ nè kùyì wela mpatà munda mwà mwoyi wèbè to, kàdi witabuuja ne ciwāmbì aci necyènzekè, udi mwà kupeta ciwāmbì aci.” Kàdi kanwèna mwà kwimana mwaba awu nudìngidija mu meeji ènù nè nwamba cyôci aci, nudi nè cyà kwikala basonsòdìibwe bwà kucyàmba. Amen!

129 Nwamfwilaayiku luse bwà cyakwidi aci; kàdi ditùkù adi, musòmbè mwaba awu mu diitu amu (nè Nzambì m’Mulumbulwishi wanyì, nè ndi mufwànyine kukùluka kufwà mu cyambilu eci), pàvwà Mufùndu awu muntàcishe mu nsòmbelu wanyì mujimà . . . musòmbè mwaba awu mu dindà adi mu diitu, nè mvwa ngèèla meeji ku cyôci aci, ke Dìyì adi kwakula naanyì, Yèyè kwamba ne: “Mufùndu awu wùdi bu Mifùndu yònsò, M’mulelèlà.”

130 Ki mémè kudyàmbidila nè: “Èè, mbifwànyine kwenzeka bìshi’s?”

131 Ki Yèyè ne: “Wèwè udi . . .” Mémè ne . . . Yèyè ne: “Akùlà, nè nebìikalè mùshindù awu. KùCyèdi mpatà to.”

132 Nènkù mvwa ngàakula ne Muntu kampànda, musòmbè lwà mu diitu mwàmwa. Kakùyì nshindì, mvwa muntwamu kùkaavwa matùkù àsàtù, kakwèna nshindì kuntwaku to. Kàbidì mvwa musòmbè mu cipuka cyà micì yà sikòmò. Nshindì kayìtu nànsha yìlwa . . . muzombi yònsò wa nshindì ewu, mmumanyè ne kayìtu mu mucì wà sikòmò to. Nènkù mvwa musòmbè mwaba awu; nè lupeepèlè lùtuuta bikolè menemene, lwà pa dìbà dikùmi wa dindà jaajaja, nènkù mvwa munkacì mwà kwelangana meeji cyàkàbidì.

133 Ki kwambaDì nè: “Udi munkacì mwà kuzomba, nè udi ukèngela nshindì ànu mùvwà Abraham ukèngela cimpàngà cyà mùkòòkò amu.”

134 Mémè kudyàmbidila ne: “Aci’s citu misangu yònsò ànu cingambila Bulelèlà, kàdi eci cidi cyumvwika cyà pabwàci.” Ki mémè kajuuka mwaba wùmvwà musòmbè awu, kukènzakana nseke yònsò nè: “Muntu mwinè uvwa wakula naanyì awu ùdi penyì?” Cintu nànsha cìmwè; cipeepèlè cituuta ànu bikolè. Ki mémè kudyàmbidila nè: “Ndiku mufwànyine kwikala mulààle tulù kàdi kulòota cyôci aci anyì? To, ncìvwa mu tulù to. Mvwa musòmbè mweyèmène ku mucì aku, munkacì mwà kutàngila, mvwa ne cyà kuya kangata Mwanèètù Wood ne Mwanèètù Sothmann lwà paanyimà pààpa, ànu mu katanci kakesè cyanàànà, lwà pa dìbà dikùmi jaajaja wa mu dindà. Baabidimè bònsò kuntwaku bamònàngàne nè mudimu, bàkùngwija matalà àbò.”

135 Ki mémè kuDyùmvwa cyàkàbidì, dyàmba ne: “Udi munkacì mwà kuzomba, nè udi dijinga ne nyama yà mwitu. Mbùngi kaayi bùdi ukèngela?”

136 Ki mêmè kudyàmbidila ne: “Mpindyewu, ncyèna muswè kupicisha búngì to, nêngìikalè ànu mwà kulòmba yìsàtù, nshìndi yìsàtù. Ndi muswè nshìndi myànà, yìsàtù mikùnze. Ndi naayi dìjinga.”

137 Ki kwambaYè nè: “Nàнку akùlaaku bwà bwalu abu.”

138 Nènku mêmè kwamba nè: “Ndi ne cyà kupeta nshìndi myànà yìsàtù mikùnze.”

139 Yèyè ne: “Njila kaayi wàlwilayi?”

140 “Èè,” Mmungàakadyàmbidilà, “ndi muyè ntàntà mule nùнку, kùdi Cintu kampànda cyàkulangana naanyi mwab’ewu.” Byà mwomùmwè ànu nè munùdi nungumvwa ngàakula amu. Ne Nzambì mu Dyulu, nè Bible ewu pa mwoyi wànyì, mmumanyè nè aci ncilelèlè. Ki Yèyè...Ki mêmè kwamba nè: “Èè,...” Mêmè kwangata kaaba kàà macimbu’s, dibèji dyà kale dyùmè dilembèlèle kuulu aku (mu mètres matwè ku makùmi ànaayi, mwaba ùvwà cingoma cyànyì cikùmìibwe).

141 Mêmè kwamba nè: “Wa kumpàla neikalè ànu mwaba wàwa,” nàнку ki yèyè awu mwaba awu.

142 Mêmè kudìkùpula kwìsù ne kutàngila paanyimà (Mêmè kukùdimuna mutù), ki mêmè kudyàmbidila nè: “Ncyèna muswè kwasa cingoma mu cikèèna-kumòna to.” Pa nàнку mêmè kukènzakana kàbidì, ki nshìndi awu musòmbe mwaba awu. Mêmè e kwela mutèlèngè mu cingoma cyànyì, kuludika, nènku mvwa mwà kumòna dísù dyèndè difiike adi, nshìndi mwànà mukùnze. Mêmè kudyàmbidila nè: “Ndi—ndi...pàmwàpa ndi mulààle tulù, nè—nèmbiikè ku tulù mu tusunsa tukesè emu. Nwamònu’s, ndi ndòòta cyòci eci.” Èè, mêmè kutùkija, kwasa nshìndi nè yèyè kukùluka ku ditàmbà aku. Mêmè kudyàmbidila ne: “Èè, ncyèna mumanyè to.” Mêmè kudyàmbidila nè: “Èè, bìvwa bikèngela nye kamukèba anyi?” Nènku—nènku ki mêmè kuya kuntwaku, ki yèyè awu mulààle paanshì. Mêmè e kumwambula ne mashi ènda àmupàtuka. Cikèèna-kumòna kacìtu cimata mashi to, nudi bamanyè’s. Pa nàнку mêmè kumwambula, nè ùvwa n’shìndi. Mêmè kuumvwa nzembu menemene, mbidi mujimà.

143 Ki mêmè kukènzakana, kwamba nè: “Nzambì, awu ùvwa ng’Wèwè!” Mêmè nè: “Twasàkidila, bwà eci. Mpindyewu nèmpatukè nè...”

144 Yèyè kwamba nè: “Kàdi’s uvwa *mwàmbè!* Udi wela mpatà ku ciwàmbì anyi? Wèwè wàmbì ne neùpete ‘yìsàtù.’ Mpindyewu udi ulonda awu neàlwile penyì?”

145 Mêmè kudyàmbidila nè: “Èè, pangìkala ndòòta, nèntungunukè ànu ne kuloota.”

146 Nàнку mêmè—mêmè kwamba...Mvwa mwambùlè cipànda cyà kale mwaba awu, cyà mucì kampànda civwà cijìngila cyònsò kùdi myonji yà lulengu. Kwènà mwà kupeta nshìndi

muntwamu to. Pa nàнку mèmè e kwamba ne: “Kàdi kààlonda nekikàlè lwà mu myonji yà lulengu mwàmwa,” kàdi ki nshindi mutekète mukünze wàwa musòmbe mwaba awu muntàngile. Mèmè e kutèeka cingoma cyànyì pànshì, ne kudikùpula mwísù. Mèmè kukènzakana cyàkàbidì, mèmè kudyàmbidila ne... Kì yêye wàwa mwaba wàwa, mutùma mutù wèndè ku luseke. Mèmè e kwasa nshindi awu, nè pashìishe mèmè e kutwàdija kuya pambèlu.

147 Kàdi yêye kwamba ne: “Wàmbi ne ‘yisàtù’! Udi wela mpatà byùdi mwambè anyi?”

148 Mèmè kwamba ne: “To, Mukalenge, ncyèna ngèèla mpatà ku cìndì mwambe eci to, bwalu Wèwè udi munkaci mwà kushìndika.”

Ewu m’Mufùndù wùmwèpelè wùvwà muntàcishètàcishe: “Kabiyi nè bu *Mèmè* mwà kwamba to, kàdi bu *wèwè* mwà kwamba.” Kabiyi nè bu *Yesù* wàkacyàmbe to, kàdi bu *wèwè* mwinè ucyàmbe.

149 Ki mèmè kudyàmbidila ne: “Mu mùshindù kampànda anyi kansanga ngàpeci kajila aku, nè ndi mumanyè nè Yêye ùdi kaaba aka bwalu ndi mwambe kwikala mupàtùke mu mèmè.” Mèmè kudyàmbidila nè: “Nèngènzè eci cyà cicimbè, cyà bushùwà menemene.”

Mèmè kwamba nè: “Nekwikalè nshindi mukünze ùtùuluka ku kakùnà *kwàka*, ùpweka ùlwila lwà ku *elu* luseke, nè ànu lwà kùndi mèmè eku, nè ùpàtuka, nè ùsòmbe pa ditàmbà *dyàdya*, ùtàngila pànshì lwà kùdi cidimà *wàwa*.” Kì yêye udi upweka kakùnà ewu, ùpàtuka buludì, nè musòmbe, mutàngile cidimè. Kì mèmè kumwasa.

150 Sàtaanà kungambilayè nè: “Udi mumanyè mùdi bwalu anyi? Diitu s’ndyùle ànu tètè naayi, mpindyewu.” Kì mèmè kushààla musòmbe mwaba awu too ne pa dībà dikumi ne yibidi, kàdi cintu cikwàbò nànsha cìmwè kaciyi cyenzèke to. Bidi bìleeja ne pàdi Nzambi... Yêye ki Mufùki mene wa Maulu nè buloba!

151 Munkaci mwà kutèeleja, mu Jeffersonville mpindyewu, kùdi dīkù dibikidiibwa nè Wright. Mèmè nè Mwanèètù Wood tuvwa bayè bwà kamumòna. Bàdi bènza mvinyò wa mèèsà à Mukalenge bwà èkèleeziyà. Edith mukesè ùvwa musòmbe mwaba awu mu cibambalu amu; mwànà mukesè wa bakàji cikalàbà, uvwa usaama matùkù èndè wònsò à mwoyi, nè pa nàнку tuvwa misangu yònsò ànu tweyemena Nzambi bwà kumwondopa. Mwanààbò wa bakàji, mukàji mukàmbà, bàyèndè ùvwa mushipiibwe; dīnà dyèndè ùvwa ng’Hattie, mukàji mukesè mudipwekèshe. Kàdi dībà dīvwa Mwanèètù Banks ne mèmè bayè bwà kumtwàdila kàlulù, bàvwa balàmbe mùkàtā munène mwela tumuma tukünze; nè kunsòmbeshabo pànshì bwà mèmè kudyà.

152 Tuvwa bônso basombe banyungulukile mèsà, tuvwa twakula bwà bwalu ebu, cyakenzeka ànu ndambù wa matùkù kumpàla. Nènku patùvwà basombe banyungulukile mèsà apu, ngàakula pa cyôci eci, dyakâmwe mémè kwamba nè: “Ncinyi cìvwàku cìfwányine kwikala cyenzèke?” Mémè kwamba nè: “Mwanètù Wright, udi muntu mukùlakàje, muzombèzòmbe nshindi kacya ku bwànà bwèbè. Mwanètù Shelby, udi muzombi mupilùlùke wa nshindi. Mwanètù Wood, ki mùdi pèèbè. Udi muzombè kacya ku bwàna. Kacya nukààdikù bamòne nshindi mu cipuka cishitakàne cyà micì yà sikòmò ne yà musesa anyi?”

153 “To, mukalenge.”

154 Mémè kwamba nè: “Yôyi kayìvwa ànumù to.” Mémè nè: “Cintu cìmwèpelè cìndi mumanyè ncyà nè, Ûdi ànu Nzambi umweumwe awu. Pàvwà Abraham ùkèngela cimpàngà cyà mùkòòkò, Yèyè ùvwa *Yehowàh-yilè*, Ûvwa mwà ‘kudìpetela Yèyè mwinè.” Mémè kwamba nè: “Ndi ngùtabuuja ne ncintu ànu cyôci cìmwècìmwè aci.”

155 Ki Hattie wa kale mukèsè udi musòmbe pààpa wàwa, kwambayè nè: “Mwanètù Branham, aci cidi ànu Bulelèlà pa bwòbù!”

156 Kwambayè cintu cìmpè! Pàakambàye nànkù, Nyumà Mwìmpè wàkapòna cyakàbìdì mu kajila aku, yònsò wa kùdìbo kuCyùmvwayè. Mémè kjuuka, kwamba nè: “Mwanètù wa bakàjì Hattie, EMU MMÛDÌ MUKALENGÈ WÀMBA, wèwè wàmbi dìyi dijaalàme bu mwàkamba mukàjì mwena Syrophénicie. Nyumà Mwìmpè ùdi wàkula naanyi mpindyewu, nè wàmbi bwà mémè kukupèèsha dijinga dyà mwoyi wèbè.” Mémè kwamba nè: “Mpindyewu, pùikalàbi ne mémè ndi musadidi wa Nzambi, byòbi nànkù, necyènzèkè. Mémè nciyi musadidi wa Nzambi to, díbà adi ndi mwena mashimi, nè kacyàkwenzeka to, ndi museeswishanganyi.” Mémè kwamba nè: “Mpindyewu teetàayi nùmonè, ní n’Nyumà wa Nzambi anyi kì n’Yèyè.”

157 Yèyè nè: “Mwanètù Branham,” (bantu bônso’s bàvwa bàdila myadi), yèyè nè, “cìngààlòmbà ncinyi?”

158 Mémè nè: “Udi nè mwanèènù wa bakàjì mucibùkile panshi udi musòmbe pààpa wawa.”

159 Mvwa ne ndola makumi àbìdì mu cibòmbi cyànyì, yà kumupèèsha, yìvwàye mufilè- mu dipà. Mukàjì awu kènà ùpeta ndola nkàmà yìbìdì ku cidimu nànsha, mu kaabudimi kakesè, kàà kale, kakwàte ne byà luse aku, yèyè nè bàna bèndè bàà balùme bàbìdì. Bàna bèndè bàà balùme bàvwa ne cyà kwikala baa ‘Ricky’, matùkù à kàlaasà, nudi bamanyè’s, nè biikàle anu bàseka mamwàbò; ne bidimu dikumi ne bitaanu, dikumi nè bisambòmbò. Nènku, kaa, bàvwa biimàne mwaba awu bàseka bìmvwà ngàmba abi.

160 Ki mémè kwamba nè: “Wèwè udi nè taatù nè maamù basòmbe kaaba aka bàkaadi bakùlàkàjì. Kwèna nè mfrangà nànsha yà kànà to. Lòmba mfrangà, bwà kumòna ní yìdi yìlwa pa bibelu byèbè apu. Lòmba bwà mwanèènu wa bakàjì, ùmone ní kààkujuukila kuulu ne kwenda.” Mémè kumanya díbà adi, bu Yobò, nè kùdi ànu cintu kampànda cyùdi umanya paùdi ufikakù. Mémè nè: “Ndi mumanyè! S’ki mémè ewu mwimàne kumpàla kwà bantu batwè ku dikumi,” mémè nè, “eci cyòci kaciyi cyenzèke to, díbà adi mémè ndi muprófetà wa mashimi.”

161 Yèyè ne: “Cingàalòmbà ncinyi’s?”

162 Mémè ne: “Aci’s ncikutàngile wèwè bwà kwangata dipàngadika dyèbè. Ncyèna mwà kukwangacila dipàngadika to.”

163 Kukènzakanayè, mukàjì mutekète awu. Ki dyàkàmwè, kwambayè nè: “Mwanèètù Branham, dijinga dyà ditàmbe bunène mu mwoyi wànyì lupàndù lwà bânà bàanyi bàà balùme bàbidì.”

164 Mémè nè: “Ndi nkupèèsha bânà bèèbè bàà balùme, mu Dìna dyà Yesù Kilstò.” Bòbò pààbò munkaci mwà kukenya ku mènù, bàseka, bansongalùme beedi bàà mapikù abo kudishindabò pa bibelu byà mamwábò, nè kulekelelabò nsòmbelu wabò kùdi Nzambì, nè kuujiibwabò tètè ne Nyumà Mwímpè mwaba awu mene.

165 Bwà cinyi? Aci’s m’Bulelèlà! Nzambì ùdi ne bukòokeshi bwà kunshipa, kumpàla kwà bantu aba bàdi mu ditùnga dijimà. Bààbùngì bàà kunùdi kaaba aka nè mu Jeffersonville, ndi mwà kuumvwa mùdi tabernacle wela lubilà mpindyewu nè: “Amen!” bwalu mbasòmbe mwaba awu mene munkaci mwà dicitèeleja. Nwamònu’s, bwalu m’Bulelèlà! Ncinyi ciine aci? Ndìbà didì Nzambì, ku ngàsà Wendè mudiikàdile; didici cyènzeka! Pambèlù pàà aci, kacyàkwenzeka to.

166 Mu díbà dyà ntàpè-nkutàpe adi . . . Elàayi meeji bwà bantu ne bantu bándì mumanyàngàne naabò. Nzambì ùcinguluka bantu bònso bàdi bamanyike bikolè abu, ne bikwàbò byònsò, bwà kupèèsha mukàjì mukesè mukùlàkàje, mudipwekèshe, kàyi mufwàne kufùnda dìnà dyèndè sungasunga to; nè Yèyè ùvwa mumanyè civwàye mufwànyine kulòmba aci. Nènku aci civwa cintu cyà citàmbe bunène; bwalu mwanààbò wa bakàjì ukaadi mufwè mpindyewu, nè mamwèndè nè tatwèndè bàdi nè cyà kufwà, mfrangà ayi yìvwa nè cyà kwikala mibùtùke, kàdi misùukà yà bânà bèndè bàà balùme yìdi yà Cyèndèlèlè! Nènku ki díbà adi divwàbo mwà kuWùkwàta. Nènku ndi mwenze ànu ngàmbe nè: “Ndi nkupèèsha bânà bèèbè bàà balùme, mu Dìna dyà Yesù Kilstò,” ke bòbò abu kudishinda pa bibelu byà mamwábò. Mbanganyì mwab’ewu bàdi bamanyè ne aci m’Bulelèlà, nudi bacimanyè anyi? [Disangisha didì dyàmbe nè:



“Amen.”—Muf.] Nwamònu anyi? Ncyà bushùwà. Èyowà. Bwà cinyi? Disonsodiibwa!

<sup>167</sup> Mpindyewu: “Ndi mûmvwè bàakula bwà bwalu Bwèbè, nè Wèwè uvwa mwà kufùka nshìndi; mvwa mûmvwè bàakula Bwèbè, nè Wèwè uvwa mwà kufùka cimpàngà cyà mùkòòkò; kàdi mpindyewu nyèwù nKumòna, ne dîsù dyànyì mèmè mwinè!” Dimwènèshiiibwa, cikèènà-kumòna cimwènèshiiibwe. Pàdi Nzambi mulayè cintu kampànda, ki cyenzàYe ncyòci aci.

<sup>168</sup> Mònaayi nè, paùdi nè dijinga kampànda, pàmwàpa bu Yoshùwà. Ûvwa nè dijinga; kàvwakù yèyè mwelè meeji ku maalu àvwà ènzekà awu to, wàkacyàmba, ne cívwa n’Nzambi! Nudi nwitabuuja ne dîbà dyàkiimana tèndé anyi? Ke mmúndi pàányi ngiitabuuja. Mmunyi mwàkacyènzàdi? Kùteeci kudifwànyikijilaci to, kàdi dyàkacyènzà. Yoshùwà wàkacyènzà, nè wàkajuula byanza byèndè muulu; mu dîbà dyà ntàpè-nkutàpe adi wàkafika kùdi Nzambi, nènku ke cyàkenzekà ncyòci aci. Cívwa mmu cikondo. Nyumà wa Nzambi udi nè mwoyi ùkaavwa mumòne dijinga dyà cyòci aci, nè kucisàkayè pa Yoshùwà bwà kucyàmba. Nzambi umweumwe awu wàkamòna dijinga dyà Abraham. Nzambi umweumwe awu wàkamòna dijinga dyà kushìndikila Mufundu ewu, bwà ne Mufundu *awu* mmulelèlè, wòwò pààwù’s! Nzambi umweumwe awu wàkamòna dijinga dyà bânà bàà balùmè bàbìdi badyànjila-kulongolola abu, nè mpa dîbà adi pàakaciaadikàYe nè kushìndika Dîyi Dyèndè.

<sup>169</sup> Maakò Munsantu 14, tudi tumòna mukàji kampànda wàkaMwitabuuja, ùvwa ne dikèngela kampànda ne mumòne ne Yèyè ùvwa ne dikèngela dyà makàsà Endè kusukudiibwawù, bìvwa bikèngela ànu àsonsodiibwè bwà kudítwayè mu cyenzedi. Mpindyewu tèèlejàayi ne ntèmà bu...kumpàlà kwà twètù kujikija. Bìvwa bikèngela ànu kwikalayè musonsòdiibwe bwà kudítwayè mu cyenzedi, bwalu ùkaavwa mumanè kuumvwa bàakula bwà bwalu Bwèndè. Ûvwa mûmvwè ne “Wàkafwila mukàji kampànda luse ku mpèkaatù yèndè, ndumbà kampànda. Ki yèyè kwamba nè: ‘Nganyì wa kunùdi udikù kàyì nè mpèkaatù? Àmwasè dibwe dyà kumpàla.’” Ùkaavwaku muumvwe bàakula bwà bwalu Bwèndè, kàdi mpindyewu yèyè wàkaMumòna. Ûvwa musonsòdiibwe bwà kuMukwàcila mudimu. Ki cintu cimwèpelè cidi cikèngela wèwè kwikala ncyòci aci.

<sup>170</sup> Nyumà Mwímpè àkwambilèku ànu nè “Wèwè udi ngènzàmpèkàatù!” Nyumà Mwímpè àkwambilèku ànu nè “Udi mupiiile!” Nyumà Mwímpè àkujaadikilè ku Mifundu nè “Wèwè udi mutùpàkàne mu Mifundu!” Ne cidi...bwalu Yèyè neàsambulukè ànu mu kajila kàmwè buludi kàà Mufundu wònsò wà Nzambi, Yèyè kààkucingulukakù bwà kantu nànsha kàmwè to. Wèwè mwenzè nànkù, kaCyàkukukwàcishakù to. Bwalu Nyumà Mwímpè ùdi mwà kukusonswelaCì, kàdi musùukà wòwò kawùyì mujaalàme kumpàlà kwà Nzambi to, bu mutùkaadi baciiyile mu lumingu elu, kabyèna ànu bimpè to nànsha bìshi.

Vùlukàayi nè, balaaba maanyi bàà mashimi nebàjuuke mu matùkù à ndekeelu; kí mba-Yesù bàà mashimi to, ba-kilistò bàà mashimi (balaaba maanyi abu), nè nebààseeswishè Basungula mene bu nè bìvwa mwà kwenzeka.

<sup>171</sup> Mònaayi nè, yêyè ùvwa nè mudimu wà kuMwenzela. Ukaavwaku múmvwe bàakula bwà bwalu Bwèndè, mpindyewu kuMumònayè nè mèsù èndè. Mukàji awu ùvwa nè mudimu wà kwenza, kàdi kàvwa nè cyà kuwènta naaci to. Pa nàнку kuvùkutayè lùbilu nànsha nàнку, bwà kwenza mudimu, Nzambi kufilayè màyi ne matwàya bwà kusukula makàsà Èndè. Ùkaavwa múmvwè bàakula bwà bwalu bwà Nzambi udi ne mwoyi, matùkù èndè ónsò à mwoyi, kàdi mpindyewu yêyè wàkaMumòna ne èndè àbidi. Yêyè ùvwa mumanyè ne ùvwa n'Yêyè, ke disonsodiibwa kumulenga, dyàmba nè: “*Ewu s'ki Mùsànjeelà!*” Bivwa bìMukèngela mudimu (mukàji awu kàvwa nè cintu nànsha cimwè cyà kuMukwàcila naaci mudimu to), makàsà Èndè àvwa nè manyaanu. Kàdi yêyè wàkavùkuta lùbilu mutàngile ànu kumpàlà nànsha bìshi, bwà kuMwenzela mudimu, bwalu ùvwa musonsodiibwe bwà kucyenza.

<sup>172</sup> Éyi cidimba cyà èkèleeziyà mutwè cimpingà, mulùme anyi mukàji wa cyena màngumba, kwènakù mwà kumòna dijinga didi Yesù naadi dilòlò edì anyi? Disonsodiibwa dyòdi ànu mwà kukulenga, ki díbà ndyòdi edì dyà kucyenza. Kàdi yêyè mukàji awu wàkaMumòna nè èndè àbidi. Bakwàbò mwaba awu bàvwa mene bàMuseka. Kabàvwa biitabuuja Mukenji Wèndè to. Bwà kwamba menemene, mwakididi, mpaasàtà mwakididi, mukùlumpè Simonà, ùvwa muMusòmbèshe panshi kuntwaku bwà kuMuseka. Kabàvwa biitabùùje ne Yêyè ùvwa mupròfetà to.

<sup>173</sup> Pa nàнку díbà dyàkamwèkàbi bu nè dyabùlù ùvwa mucyenzè ànu bwà yêyè kwambayè nùнку, wàkadyàmbedila munda mwèndè nè: “Muntu ewu wikala mupròfetà, ùvwa mufwànyine kumanya nè mmukàji wa mùshindù kaayi uvwa ku makàsà èndè awu. Bu wikala mupròfetà!” Nwamònu's, kacivwa nànsha cimubuulwila ne Yêyè ùvwa Nganyi to. Kakùvwa kufwànyine kwikala disonsodiibwa nànsha dikesè dyà dimulengà to, bwalu kakùvwa cintu nànsha cimwè mwaba awu cyà kulengadi to. Kàdi dyàkalenga mukàji awu!

<sup>174</sup> Mèsù èndè àvwa mamòne dyàmwàmwà dyà didyudiibwa dyèndè adi. Mukàji ùvwa mwitabùùje nè ke civwàYe, nwamònu's, Dìyi dyà bapròfetà. Ùvwa mumanye nè Aci civwa m'Méyi ónsò à bapròfetà, àvwa mashindikiiibwe munda Mwèndè. Ùkaavwa múmvwè nè Yêyè ùvwa pa buloba, kàdi mpindyewu ùdi ùMumòna. Tàngilàayi nùmone cyàkenzàye. Mukàji awu wàkamòna Dìyi divwijiibwe mubidi, Maasiyà, Emanùwèlè awu. Pààkafilàye njila kùdi dituuta dyà diitabuuja dyèndè (bwà dibuulula dyà ne Yêyè ùvwa Nganyi, mu cikondo civwàye ne mwoyi aci, bwà ne Yêyè ùvwa Mwànà wa mùkòòkò wà

Nzambi bwà bangènzàmpèkààtù bàà mùshindù ùvwàye awu), wàkashidimba bwà kwenza bivwàYe ùkèngela kàyì mumanyè mùshindù ùvwàye mwà kucyènza.

175 Mùshindù awu ki ùdì dyondopa dilelèlà dilwa, pàdidi dibuulùdìbwe kùdì nè “Wàkatàpiibwa mpùtà bwà dishipa dyèbè dyà mikenji, muzaajìbwe bwà bubì bwèbè, nè ku mibùndàbùndà Yèndè wèwè wàkondopiibwa.” Pàdici cisonsòdìbwe kùdì bwà kumòna Bwikadi Bwèndè kaaba aka, bwà Maakò Munsantu 11, anyì, Luukà Munsantu 17.30, bwà nè Yèyè neikale mwà kuDibuulula mu matùkù à ndekeelu (munkaci mwà bantu Bèndè, mu mubidi wà buntu) bu mwàkenzàYe kumpàlà kwà Sodomà. Paùdì umòna aci, nènku cintu kampànda cìdì cìkulenga’s!

176 Ngàngàbukà mmufwànyìne kwamba nè: “Kànsèrè aku kàcìdì ànukù.”

177 Mubèèdì awu mmufwànyìne kwamba ne: “Mémè—mémè—mémè—mémè—mémè ncyèna mumanyè mungèndà to, kàdì nèngèndè nànsha bishi.” Katwèna bamanyè mwènzàci to.

178 Mukàjì awu kutùngunuka bwà kuMukwacila mudimu, bwalu disonsodiibwa dyàkaMulenga...dyàkamulenga, aci ke cìvwà dìbà ndyòdì adi, awu ùvwa Mùsanjeelà awu, awu ùvwa m’Maasiyà Uvwa nè cyà kwondopa awu, nè yèyè mukàjì awu kuCìitabuujayè. Ne Yèyè ùvwa ùkèngela kuMwenzelabò mudimu, ne mukàjì awu wàkatùngunuka kàyì nè cintu nànsha cimwè cìvwà cileeja nè ùvwa mwà kucyènza to. Mukàjì awu wàkatùngunuka ànu ne disonsodiibwa dyèndè. Tàngilààyi’s! Nzambi wàkatùnkumuna mpokolo yà binsònji mu mèsù èndè amu. Mèsù àmwèàmwè àvwàku mùmvwè... maci àvwà maMuumvwè awu; mèsù àvwà maCimòne awu, kutùdikawù ne disànka. Pashìishe cintu cikwàbò, nè nsukì mile yìvwà Nzambi mupèeshe ayi, ne binsònji abi bitùnkumukila panshì. Nzambi wàkamupèesha matwàyà (ne nsukì yèndè ayi), nè binsònji byèndè abi. Wàkasadila makèngela Èndè, dikèngela dyà Nzambi udi nè mwoyi. Úkaavwa mumvwè bààkula bwà bwalu Bwàdì, kàdì mpindyewu wàMunònyi, ùvwa mwà kuMusadila.

179 Kaa wèwè ngènzàmpèkààtù’s! Bwà cinyì kwèna mwà kwenza mùshindù awu paùdì umòna makèngela mpindyewu apa? Bwà ne Yèyè ùdì ùkukèngela, ùkèngela mudimu wèbè’s! Mpindyewu nudi numòna Yèyè awu, Unùvwàku bùmvwè bààkula Bwèndè mu Bible awu. Tudi baMumòne makèlèlèlà dilòlò awu ùbwela mwab’ewu, ne cyènjiYe aci. Tudi tuMumòna, paanyimà pàà disangisha ne disangisha dyònsò, ne mîngà misangu tudi tushààla ànu basòmbe bakwàte mashìka ne katùyì tucyùka maalu to, twamba nè: “Èyowà, ndi mumanyè ne Mufundu wùdì wùcyàmba. Kaa, nkààdì—nkààdì mucimòne cyenzeke, nwamònu’s.” Katwèna ne dizùka to, kabyèna

bimwèka bu ne cidi citùlenga mu mùshindù mujaalàme to. Kakwèna kumwèka bu ne kùdi cintu kampànda to, byenzè bu kupòngolola . . .

<sup>180</sup> Kwangata kaci kàà alàmeetà ne ùkàtápisha, piikalà kaci kàà àlàmeetà aku kakàyi ne bwanga lwà ku mutù kwà kaci eku to, kakèèna mwà kutápika to. Nènku udi mwà kutápisha nè kutápisha nè kutápisha, kàdi piikalà bwanga kampànda bwà mushindà buvingùtùle bwanga bùdi ku mutù aku abu, kakàakuteema to, kakwàkwikala bukènkè nànsha. Kàdi piikalà bwanga bwà mushindà abu, bwanga bwà àlàmeetà bwà kutápisha ku cilatalata abu nebwikalè . . .bòbù ànukù pàdibo babùtápisha, nebùteemè.

<sup>181</sup> Nènku pàdi dishindika dilelèlè, dishùwashùwàlè dyà Mifùndu yà Mukenji wà ditùkù dyà ndekeelu edi, nè nudi numòna Bwikadi bwà Yesù Kilstò, unwàkùmvwà cyàkenzàYe mu nsòmbelu Wendè, nè kutèeleja Mifùndù yàmba nè “Yèyè ùdi umweumwe awu makèlèlè, leelù too nè kashidi”; nènku ànu kumpàla mene kwà ngiikàdìlù wa mu Sodomà kubùtudiibwayè ne kapyà kàà ciiji cyà Nzambì, kumòna Yesù wàlukila munkaci mwà bantu Bèndè, mufwimba mu mubidi wà buntu, nè wènzà cintu cimwècimwè cyàkenzàYe aci. Ekèlekèle! Bivwa bikèngela bwà kuteemeshaci misùùkà yètù ne Butùmbi’s wè! Bivwa bikèngela bwà kutwènzèlaci cintu kampànda. Bwà cinyi? Cidi cimata pa cyòci aci.

<sup>182</sup> Nuvwa bùmvwè mu Bible cyàkenzàYe aci, mùshindù wàkalengà mukàji civwàlù Cyèndè awu. Yèyè kukùdimuka è kumwambila civwà lutàtù lwèndè, nè diitabuuja dyèndè dyàkamusàngaja. Mpindyewu, Yèyè mmulayè nè Neénzè cyàkàbidi cintu cimwècimwè aci, kumpàla menemene kwà buloba kwoshiibwabù, nè buloba nebwikalè mu ngiikàdìlù wa Sodomà. Dipungila Dipyadiyà, Mupròfètà, Mupròfètà-Nzambì, Mupròfètà wa bapròfètà, Nzambì wa bapròfètà bònsò awu, kaabujimà kàà Bunzambì mu ngiikàdìlù wa mubidi, Nzambì wa . . .mumwènèshìbwe mu mubidi, Mufùki, wa Genèsè. Alèluuyàh! N’Diyi Dyèndè! Yèyè mmwambe nè necyènzèkè! Nènku tudi tumòna ngiikàdìlù wa Sodomà, tudi tumòna buloba mu ngiikàdìlù awu, mpindyewu tudi tuMumòna ùtùùluka wènzà ànu menemene cyàkambàYe ne Neénzè aci. Mpindyewu, tuvwa bùmvwè bàakula Bwèndè, mpindyewu tudi tuMumòna! “Ntu mùmvwè bàakula Bwèbè nè maci àanyi, mpindyewu nyèwù nKumòna nè mèsù àanyi.” Amen! “Ndi mMumòna ne mèsù àanyi sungasunga.” Ndìbà kaayi divwàbi bikèngela kwikalaci’s wè! Cikondo kaayipu civwà cìkèngelà kwikalaci’s wè! Dishindika dyà Dìyi Dyèndè! Misangu yònsò pàdi Dìyi dishindikìbwe, awu’s N’Nzambì wàkula mu Dìyi Dyèndè, uDivwija wa ùmwènèka unùdi mwà kumòna.

<sup>183</sup> Mpindyewu, ki ndumbà mukesè wa kale wa mu mùsèèsù ewu, ùdi ukùluka ku cyoshelu, kumpàla kwà Yesù, nè yèyè

wàkasukula makàsà Èndè nè—nè binsònjì, nè—nè kubìkùpula nè nsukì yèndè. Nzambi wàkatwa musinga, Yèyè wàkamba nè: “Mwaba wònsò wùdì Èvànjeeliyò ewu munkaci mwà kuyiishiibwa awu, bwalu ebu bùlondiibwè bu civùlukilu bwèndè yèyè.” Bwà cinyi? Tàngilàayi numòne mùvwàye mukooyà, kàdi cintu kampànda cyàkalengà. Yèyè wàkamòna Dìyì dyà mulayi, difùmina mu budimi bwà Edènà, nùnkù ewu: “Dimiinu dyà mukàjì nedizaazè mutù wà nyòka.” Yèyè wàkamona Maasiyà wàkalediibwa kùdì virgò awu.

<sup>184</sup> Wàkumvwa ne Yèyè ùvwa nè cyà kwikala mulediibwe kùdì virgò, kàdi kuumvwabò nè Muntu awu ùvwa pa buloba. Wàkumvwa ne kùvwa Laabi mutekète, Mupròfeta, Wàkondopa babèedi awu. Wàkiitabuujà aci’s! Ki yèyè udi upweka nè mùsèèsù ewu, wèndakana eku nè eku, wènda ùkènzakana. Ki kutàngilayè kwàka è kumòna difestò dinène adi dyènda dimònàngàne. Kudifindayè ku lupangu aku, nè kutàpayè dísù too ne kundekeelu, nènku ki Yèyè wàwa mwaba awu. Ki Yèyè awu mwaba awu’s! Cintu kampànda kwambaci nè: “N’Yèyè awu’s!” Nwamònu’s, ki cyònsò civwà cimukèngela bwà kwikalayè musonsòdiibwe. Nudi numòna cyàkenzèkà anyi? Yèyè wàkamòna Dìyì dyà Nzambi divwijìbwe mubidi. Ùkaavwa muumvwè ne dicit dyèndè, mpindyewu wàkamòna ne mèsù èndè.

<sup>185</sup> Mpindyewu, bantu bònsò mbamanyè nè tudi nè mulayi wà ngiikàdilu wa èkèleeziyà, mu ditùkù dyà ndekeelu. Èkèleeziyà, mu ngiikàdilù wèndè udiyè mpindyewu ewu, kèna mwà kuuja mèyi matùma à Nzambi to, mudimu munène mubàtùma naawù, kàyìku mufwànyine kubiikila Mukàjì—musèla bwà kupàtuka to. Nganyì udi mufwànyine kucyènza? Beena Mpenta anyi? Ndi ne cyà kwamba nè to. Nànsha umwe wa ku bakwàbò abu. Aci’s ke cizuba cidì pa blé ncyòci aci. Cyàkapàtukà, cyàkamwèka ànu bu blé, kàdi kacivwa ne blé munda to. Cyàkakànguka, kàdi lutete lùdì lùpatuka munda mwàci. Bàakadyènza bulongolodi, bàakadishipa nkàayabò. Ki mwaba ùdibo bàfwila. Bòbò mbikolakola. Kàdi blé mmupàtùkilemù, nènku mpindyewu mmubangà kudifùmba mu mmwènekèlu wa Mukàjì—musèla. Lutete lwà blé lwàkamata mu buloba munda mwà bikondo byà mìdimà alu, byàkakèngela bwà kufwàlu.

<sup>186</sup> Mudyudi awu wàmba nè: “Mbwà cinyi bùdì Nzambi wa luse, mwà kukàngula Mbù Mukùnze, kwimana kàdi kulekela beena Kilistò bakwàte ne byà luse abu bàbàdya kùdì nyama yà ntambwe, ne bwòshiibwa, ne bikwàbò byònsò? Kusòmba, ànu bu ne Ùvwa ùciseka!” Cibùlangènyì wa yààyà! Yèyè kàvwa mumanyè nè: “Ànu lutete lwà blé lwòlù lumatè mu buloba” anyi? Lùvwa ne cyà kufwà mu bikondo byà mìdimà abi, ànu mùdì lutete kanà lwònsò lwà blé emu ne cyà kuya mu buloba ne kujiikiibwa, bwà kupàtula mu dilongolola dyà kumpàla tubèjì tubìdì twà Luther, cicolakola aci. Bivwa bikèngela kulwilaci mu ba-Weslèyens, kwàka nàka, bwà kupàtula bungungu bwà

bilongò, myepu, cikondo cinènè cyà bumpàndànjilà. Cìvwa nè cyà kupicila mu beena Mpenta, bwà dyalujulula dyà mapà, cyàmba kuseeswisha nè Basungula mene. Cìmwèka bu lutete lwà blé; cibүүлùlebì cyònsò, kamwèna blé munda amu to nànsha wa kànà, cìdi ànu cizubu pa cyòci. Kàdi lwà munda amu, dìbà adi, kubangabò kwenza bulongolodi bwà ba-unitaires, bulongolodi bwà ba-trinitaires, bulonolodi bwà ba-binitaires, ne bulongolodi bwà église de Dieu, ne byònsò bidilongòlòle, ciinè aci ànu lufù menempene! Nènku mpindyewu cìdi cyènzekà ncinyi? Kàdi ncisokomenu bwà blé, mmukolèlemù dìbà dyònsò.

<sup>187</sup> Mpindyewu mmubange kudikòka, blé wàbangì kumwènèka. Eci kí ncikondo cyà beena Mpenta to. Eci nditùkù dyà cikondo cyà ndekeelu. Eci ncikondo cyà Mukàji-musèla. Eci ke Bukènkè bwà dilòdòlò. Eci mpàdi Maalàki 4 nè cyà kuula, bwà kulonda citembelu cyà Nzambì. Eci mbwà Luukà 17.30, kuujiibwayè. Eci ke ciibìdi. . . Ne Yelèmiyà, ne bakwàbò bònsò abu, bàdi Yowèlà mwàmbe bwà matùkù aa abu, *edi* nditùkù adi. “Mvwa mùmvwè, Mukalenge, ne Cìvwa cìlwa, kàdi mpindyewu nyèwù nCimòna nè dísù dyànyì.”

<sup>188</sup> Nànsha byòbì nè bààbùngì. . . batentudi bàà mafi bùngì munyì mbajuuke, ba Yanè nè Yambèlè nè budimù bwàbò bwònsò bwà kwenza cyònsò cyàkenzà Mòsà aci, kabààkamunyangisha nànsha kakesè anyì Aalona to. Bàvwa bamanyè mwaba úvwa. . . bu Yobò, bàvwa bamanyè ne mwine uvwa disonsodiibwa dyàbò difùmina kùdiYe nganyì. Bàvwa bamanyè ne Cìvwa ng’EMU MMÙDÌ MUKALENGÈ WÀMBA! Nè Bible umweumwe wákamba bwàbò awu, wàmba nè: “Nebàlwe mu matùkù à ndekeelu, batentudi.” Màngumba à batèndeledi awu, pààkabangà cintu kampànda. . . Wàkabanga kumpàlà nganyì? Mòsà anyì bòbò abu? Bu nè bòbò ke bàvwa babange kumpàlà, Mòsà úvwa mufwànyine kwikala mu—mutentudi.

<sup>189</sup> Mpindyewu tudi nè bajinguludi bàà mshindù yònsò nè bikwàbò byònsò bìdi bìteetà kukùpa meeji ènù kùngà kuwùmusha ku cintu cishùwashùwàle cyà Nzambì, cìdi Nzambì mujaadike nè m’Bulelèlè ku Mifùndù Yèndè. “Tuvwa baCyùmvwè nè maci ètù, mpindyewu tudi tuCimòna ne mèsù ètù.” Amen! Nudi nuCìitabuuja anyì? Myoyi yetù yònsò! Disonsodiibwa! Nènku mu ditùkù adi piikalà Mwànà wa muntu munkaci mwà kubuuludiibwa, Mwànà wa muntu, Yesù Kilistò mumwènèshìibwe munkaci mwà bantu Bèndè.

<sup>190</sup> Muntu kampànda wàkendela mwaba awu kumpàlà kwà Abraham ne kasùmbù kèndè, ànu Muntu wetù wa mmwènèkelu wetù wà pàtupù ewu, mwikàle ne lupwishi ku bilàmbà Byèndè. Úvwa mukomè nyimà Wèndè ku ntentà, kwambaYè nè: “Mukàjèèbè Sarah ùdi penyì?” (kàyì S-a-r-r-a to, S-a-r-a-h; A-b-r-a-h-a-m, kàyì A-b-r-a-m to). Wàkabiikila dìnà dyèndè, wàmba nè: “Ùdi penyì?”

191 Yèyè kwamba nè: “Ûdi mu ntentà, paanyimà Pèèbè apu.”

192 Yèyè nè: “Nénkumwènekèlè mu cikondo cyà mwoyi” (ki mukàjì awu kusekelayè mu dyàpà). Yèyè kwamba nè: “Wásekì bwà cinyi?” (Uh-huh). Mpindyewu, Yèyè wàkalaya. Bantu abu mbàvwà bindile mwànà mulaya.

193 Mpindyewu, nànsha bantu bènza maalu mu màngumba aa bu, nè bàdi “bindile Kilistò,” byenzedi byàbò bìdi bijaadika ne kî mbaMwindile to. Ncyà bushùwà. Byenzedi byèbè bìdi byàkula ne díyì dikolè kupita mèyì èbè awu. Cyònsò cidìbo bèèla meeji bwà kupeta mbidimba byà cyena-dìngumba, kàdi mùdi bàmwè bantu, umwe *apa* ne umwe *kwàka*, bàdi bindile Dilwa dyà Mukalenge. Bàdi munkacì mwà kutàbaleela. . . nànsha nàнку. Ànu bóbò abu ke bàadibuululàYe kùdìbo, ànu bóbò abu ke bùumvwà.

194 Ànu Basungula ke bààkùmvwà nè Yèyè ùvwa Nganyi. Anjì elààyìbì meeji, kùdi pàmwápa bantu batwè ku miliyò yisàtù, beena Yudà, pa buloba apa, kakùvwa cyàbisàtù cimwè cyàbò cìvwà cimanyè ne Yèyè ùvwaku nànsha too ne mwà kalwàYe ne mwà kayàYe. Nwamònu anyi? Kàdi Wàkadibuulula Yèyè mwinè kùdi bóbò bàvwà bindile abu: Yone Mubàtiji, nè—nè bàpostòlò bàvwà babìikidìibwe kùdi Yone, nè bikwàbò, nè mpofò Annà mu ntempèlù, Simèòna mwakwidi awu “cyàkamubuuludiibwa kùdiye kùdi Nyumà Mwìmpè nè yèyè ùvwa nè cyà kumòna Kilistò.” Balombodi banène bònsò bàà ntèndeleelelu abu, beena tèòlòjì nè bikwàbò, bampofò ànu bèètù bàà menemene aba!

195 Mvùla ùdi mwà kutòlwesha dimiinu, ànu pìikalà dimiinu dikaadikù. Nè bu mùvwà wèwè ewu kumpàlà civuba mu tatwèbè, kàdi yèyè kàvwà mukumanyè to, nànsha nàнку wèwè uvwa munda mwà tatwèbè. Kàdi ku budimi bwà dyela mamiinu bwà mamwèbè, wèwè kumwèneshiibwa mu difwànangana nendè, nè dìbà adi yèyè uvwà mwà kwakula neebè. Nzambì, Nzambì Munène awu; wèwè nè Mwoyi wà Cyendèlèlè, dìbà adi civuba cyà Mwoyi wà Cyendèlèlè civwa munda mwà Nzambì ku cibangidilu. Nè wèwè uvwaku, uvwa mu meeji Èndè, dìnà dyèbè ne byònsò. Nè Yèyè, ku didyànjlila-kumanya, mmukutèèke bwà wèwè kumòna Cyòcì eci. Nè nwènù bàvwà kabàyi balongolola abu, kanwàkuCimònakù to. Kàdi, vùlukàayi nè, mu Dìnà dyà Mukalenge Yesù: “Dìbà dyàfikì!” Kwènàku muswè kuMwitabuujà anyi? Fìlaayi myoyi yènù kùdiYe. Bikèngela ngiimanyikè, tukàadi paanyimà pàà dìbà citèèmà.

Twinyikàayi mitù yètù.

196 “Nkàadikù mumvwè, Mukalenge, bààkula Bwèbè, mpindyewu ndi nKumòna!” Mukalenge Yesù, bèneshàku bantu aba pàdìbo bindile apa.

197 Mpindyewu nènnewèlè lukonko kampànda. Nèndekelè Nyumà Mwìmpè (Ndi mutwishìibwe nè Yèyè neàkenketè) neàkenketè meeji ènù, kukùteeta wèwè, kuteeta musuùkà

wèbè, kàdi kumona ní udi witabuuja cyà bushùwà. Nènku wèwè musangàne nè kùdi mpatà ndambù muntwamu, udikù mwà kwela cyanza muulu anyi? Ambà nè: “Mukalenge Yesù, nKumònèku. Nkàadi múmvwè bàakula Bwèbè, kàdi ncitukù muKumòne mu bulelèlè to. Enzàku bwà nKumònè, nèngùitabuuje.” Eyo. Abi’s mbìmpè.

<sup>198</sup> Kùdikù bàmwè kaaba aka bàdi kabàyi baMumanyè bu Musùngidi wenù anyi? Elàayi cyanza muulu, nwàmbè ne: “Bu. . . Ndi—ndi ngènzàmpèkààtù, kàdi bu mèmè. . . bu Wèwè—bu Wèwè ànu mwà kuswà bwà nKumònèku, Mukalenge Yesù, ùmwèneshè Dìyi didìbo bàmba edi. Ndi mumanyè nè mùshindù awu ki wàkaKumònà Yobò. Ndi mumanyè nè mùshindù awu ki ùvwà Abraham muKumòne. Ndi mumanyè ne ki mwàkaKumònàbo kùdi bakwàbò bònsò abu, bwalu cìvwa n’Dìyi Dyèbè dilaya diikàle dishindikìbwe. Nkàadikù muumvwè bintu byà mishindù yònsò, ne budimù, ne bikwàbò byònsò, kàdi ndi ngùmvwa ne kùdi Mukenji wa ditùkù dyà ndekeelu mu ditùnga emu, ùvwà mwambiibwe kùdi Mwanjèlò pa musùlu awu, mu cidimu cyà 1933. Mvwa múmvwe bàakula bwà midimu yà dyondopa yìvwà munkaci mwà kwenzeka, ne ndi mumanyè ne pènzekà cyòci aci, kacyèna mwà kushààla ànu mu ciibidilu cimwècimwè cyà cyena màngumba aci to.” Kadyàkatùmiibwa bwà nàнку to, kadyàkashàalapù to. [Katupà kàà mukàbà wà mèyi munda mutupù—Muf.] . . . ? . . .

<sup>199</sup> Ambàayibi tǔng bu ne Mòsà wàkalwa, kwamba ne: “Twìbakàayi bwàtù bu mwàkenzà Noà, tùpatukè mu Èjiipitù twenda tupweka ne musùlù”? Kaa, to. Nwamònu anyi? To! Yèyè ùvwà ne Mukenji wà kùdi Nzambi, yèyè ùvwà dimwèneshiibwa. Mupròfetà awu ùjuuka mu cyalu, s’bìvwa bikèngela kwikalaye mujaadikile Izalèlèlè ànu mwaba awu. Kabàvwa bapete mupròfetà to kùkaavwa bidimu nkàmà yìnaayi, kabàvwa bapete mupròfetà to, kàdi’s ki mupròfetà nyèyè ewu ùjuuka mu cyalu. S’bìvwa bikèngela kwikalabò bamanyè ne cintu kampànda cìvwa ne cyà kwenzeka.

<sup>200</sup> Izalèlèlè cyàkàbidì kàvwa ne mupròfetà to kùkaavwa bidimu nkàmà, kàdi’s ki Yesù udi umata mu cyalu ewu. Nè mukàji wa ku ciinà cyà màyi awu, kwambayè ne: “Mukalenge, ndi njingulula ne Wèwè ewu udi mupròfetà. Mpindyewu, katwèna bapetà nànsha umwe to kùkaadi bidimu nkàmà yìnaayi.” Bwalu, Yèyè ùvwà mumanyè cìvwà mu mwoyi wendè. Nwamònu anyi?

<sup>201</sup> Mpindyewu, mbatùlayè cikondo kampànda cyà èkèleeziyà kupicila mu balongolodi, ne twàkabàpeta. Kàdi Yèyè wàkalaya, mu Maalàki 4 nè, Neàshaalè mukwàte citembelu Cyèndè aci mu matùkù à ndekeelu, cìvwà mwà kwenzeka aci ne: “Bwà kwaluja myoyi yà bânà ku Diitabuuja dyà baataatù bàpostòlò.” Bwà kiipàcilà mene aku! Kàdi èkèleeziyà’s mmutàmbe kukòsoloka mu màngumba ne mu tusùmbù be, mmutàmbe kusùnsudiibwa mu tupesetupese mu mùshindù wà ne mmufwè; ùvwà cyambudi.



Ne pashiishe Yèyè wàkalaya, mu díbà dyà Mukenji wa mwanjèlò wa mwandamutekète, nè Bitampì Mwandamutekète bivwa mwà kubuuludiibwa; nè maalu masokoka à Nzambi àvwa mwà kwambiibwa patòòke (Bwàkabuulwibwà 10) pàabanga mwanjèlò wa mwandamutekète kukòbola Mukenji wèndè, kí mmudimu wà dyondopa to, Mukenji wùdì wùlondà mudimu wà dyondopa awu.

202 Yesù ùvwa “mulùmyànà munène” díbà dyònsò divwàye ànu mwà kwondopa babèèdi adi. Kàdi Yèyè wàkamba ne pàdi: “Mémè ne Taatù Wanyì tudi Umwe.”

203 “Huh-uh! Aci’s civwa cyà mashimi!”

204 Yobò ùvwa “munène,” too ne pàakalwà cintu kampànda kumwenzekela. Nwamònu anyì? Bitu misangu yònsò ànu mùshindù awu.

205 Itabuujà! Udi muswè kuMwitaba mpindyewu anyì? Ela cyanza cyèbè muulu, wàmba ne: “Ndi muMwitàbùùje bulelèlà. Ndi muswè kuMwitaba.” Nzambi àkubènèshè. Nzambi àkubènèshè. Abi mbìmpè.

Mpindyewu sòmbaayi bapùwe viiviivi túsambilè katanci.

206 Nzambi munanga, mu cikondo cyà kaciyi tuseku eci, neciikalè cikondo cyà mùshindù ewu pàdilà bulelèlà kàpatà kàà mukungulu dīngà ditùkù, nè Mwànà wa Nzambi neàtuulukè mu maulu nè lubilà, ne díyì dyà Mwàrkanjèlò, ne mpungi wa Nzambi, bafwè mu Kilistò nebàbiikè. Nè muntu nè muntu wa kutùdì mmumanyè nè tudi bàtwishiiibwe dilòòlò edi, Taatù, nè nebikengelè bwà twètù kulumbulula bwà díyì dyònsò ditùdì tufila, ne díyì dyònsò ditùdì twamba edi. Nànsha mene meeji àdì mu myoyi yètù, netùlumbululè bwàwù. Ndi nKulòmba, Nzambi, mu Dìnà dyà Yesù, bwà Úkezulè mwoyi wònsò wùdì munda emu. Kezùlàku mwoyi wànyì, kezùlàku mwoyi yà bantu aba. Nènku swàkù bwà twikalè balongòlòdiibwe, Mukalenge, ne swàkù bwà mèsù ètù à nyumà àtabaleelèku dilòòlò edi bwà kumòna Butùmbi bwà Nzambi wa Bukolè bwònsò. Tudi bùmvwè bwalu Bwèndè, Éyi Taatù Nzambi, tudi tulomba bwà Wèwè kwenza ne tùMumòna. Enzàku nàнку, Taatù. Tùpèèshèku mabènesha aa, ndi ndòmba, mu Dìnà dyà Yesù Kilistò. Amen.

207 Vùlukà nè: Munda mwà mwoyi wèbè, mwaba wùdì musòmbe awu, enzà cyoshelu cyèbè cikesè aci. Ambà ne: “Mukalenge Yesù, bwelàku munda mwà mwoyi wànyì mpindyewu. Mpèèshèku cintu kampànda bwà . . . cintu kampànda cìndì mwà kukwàtakù. Anyisha nguumvwèku disonsodiibwa didì dīngambila ne Wèwè ‘udipù.’”

208 Mpindyewu, ndiyi kaayi dyà kwambila bantu’s wè! Cintu kaayi—kaayipu cyà dyenza’s wè! Mpindyewu nèndombè Mukalenge Nzambi, ndòmba . . .

209 Mbanganyi bàà kunùdi bàdi bàngata mikàbà yà mèyi? Nwákumvwa bwalu bwà: *Tudi Dìbà Kaayi, Bakalenge?* Tuvwa baleejè bikàndàkàndà abi ne bikwàbò, cidimu cijimà kumpàlà kwà kwenzekaci anyi? Maalu à mamanya mmabwikidijibwe mukana pa bwalu abu. Kùvwa Mukalenge Yesù mwasa cifulu cyà butùmbi ne kafulu kàà nsuki mitòòke aku munùdi numòna mu Bible, mu Bwàkabuulwibwà 1, ne Danyèlè, Nzuji wa Kumutu kwà bònsò wa Dyulu ne buloba. Ànu mwaba awu mene, pàdi maalu à mamanya kaayi nànsha mwà kuCimòna òwò miine to. Nènku mu nzùbu wa dijoojela, mwàmwa mu cilongelu cyà Nkònga myàkù cyà mu Arizona too ne mu Mexique, bàdi munkaci mwà kwenza lukèbukebu, mu bidimu bibidi bishààla ebi. Ne kwòkò aku nuvwa bambila nè civwa nè “cyà kwenzeka,” kumpàlà.

210 Kàdi twámbe bishi bwà dikanka dyà buloba dyà mu Alaska? Tàngilaayi nùmonè mùdi Hollywood ùdishinda mu mbù! Tàngilaayi nùmonè ní kèna ùmata. Kacya Yèyè kî mmwànji kungambila cintu kampànda cyà mafi to, necyènzekè. Nwamònu anyi? Kàdi tàngilàayi ànu cyanànà numòne ne katwèna ne mwoyi mu mèbà à ndekeelu à maalu-malonda. Muntu nànsha umwe kî mmumanyè ne ndìbà kaayi didiYe ùlwa to. Kàdi ndi mumanyè cintu cimwèpelè nè: Ndi ngiitabuuya nè, mu ngiikadilù wanyi wa mpindyewu ewu, piikalabi nè ndi nè meeji àanyi mu òwò, nè piikalabi nè ncivwa mwena Kilistò to, Ncyà bushùwà nè ndi mufwànyine kujinga kwikala mwena Kilistò mulelèlè wa mu Bible, kî ngwà cyena màngumba to. Kwikadi mweyemene pa nè mbwalu udi mwele mbilà to. Tuvwa buumvwe aci mu dindà emu, cijaadikiibwe ku Dìyi dyà Nzambi; cyòci cyònsò cidi pambèlù pàà Dìyi dyà Nzambi, kacivwa mwà kwenza cingà cintu to pa kuumusha kutwàla lufù. Kwikadi mu cicolakola to, ikalà mu Mwoyi. Nwamònu anyi? Ikalà ne diitabuuya mu Nzambi.

211 Udi witabuuya ne Nzambi wàkenza mulayi ewu, wàkamwènèka Yèyè mwinè, mu Mukàndà wà Genèsè awu, ne wàkamwènèkela Abraham ne wàkenza cishimà aci... Nzambi umweumwe awu wàkavwijiibwa mubidi, mubidi wà buntu, mulela kùdi virgò. Awu ùvwa tèòfànì mwaba awu, mu bushùwà bwà bwalu, kàdi pashishe pàakalwàYe mu mubidi wa buntu ne mwikàle Muntu umweumwe awu, ne mwikàle wènza bintu bimwèbimwè abi... Kanwenaayi nwitabuuya nè bu Nzambi mwà kupeta muntu, civwaYe mulayè bwà kwenza bilondèshile Maalàki 4, kajila kàvwàYe mwà kwakwilamù aku, Yèyè neenzè cintu cimwècimwè cyàkambàYe ne Neenzè kwòkò aku anyi? Nudi nwitabuuya nànkù anyi? Mémè ndi ngiitabuuya ne Yèyè mmufwànyine kucyènza, mémè pàanyi.

212 Udi witabuuya nè udi mufwànyine kwikala ne diitabuuya dyà kulenga civwàlù Cyèndè, diitabuuya Dyèndè bwà kulenga civwàlù anyi? Udi witabuuya mwaba ewu mpindyewu ne cintu kampànda cidi cyàkula ne mwoyi wèbè cidi cifwànyine

kukwambila nè udi nè diitabuuja dyà kulenga civwàlù Cyèndè anyi? Udi witabuuja nè udi mufwànyine kwenza nàнку anyi? Olòlà cyanza ùlengè ne diitabuuja dyèbè dîbà adi, kaciyi nè disaluka to, kadi ànu nè diitabuuja dikezùke, kadiyi disopakaja to. Ambà ànu ne: “Mukalenge, ndi ngiitabuuja. Ndi ngiitabuuja ne mwoyi wànyì wónsò. Ndi muswè bwà Wèwè kundenga bwalu ndi—ndi muumvwe ne Utu mucyènzè, mpindyewu ndi muswè kucimòna ne mèsù àànyì mèmè mwinè.”

213 Kadi mèmè ncyèna mwà kukulenga to. Bidi bikèngela bwà Nzambi kukulengaYè. Udi witabuuja ne Yèyè neacyènzè anyi?

214 Ndi ànu mutàngila ànu buludi paanyimà ku dyàbakàji dyànyì eku. Kùdi kùmweka bu kùdi kajila, byenzè bu, ànu mùmvwà mwàmbè, kàkòka luseke alu. Bu mùdibi ne mvwa muciludukile luseke alu, mpindyewu cidi cilwà bilenga byà dikèma. Ny'inàbànza musòmbe ne bàyèndè. Kî ngwa mùnwemu to. Ngwà ku Texas, mu Dallas. Ùdi ùsaama, ne bàyèndè kàbìdì ùdi ùsaama. Mukàji ùdi ùsaama byumùkile ku dikòndakana kampànda, bàvwa bamupandè. Ncyà bushùwà. Bàyèndè ùdi ùsaama cintu kampànda mu mwongo, dîsaamà dyà nyimà. Mukalenge ne Mandamu Corbet, bàà ku Texas; Dallas, mu Texas. Byòbì nàнку, elàayi cyanza muulu. Ndi mwenyi kunùdi. Ncyà bushùwà anyi? Kakwènakù mùshindù nànsha wùmwe pa buloba bwà mèmè kumanya aci to. Ncinyì aci? “Nkàadi muKuumvwè ku dicit, mpindyewu ndi nKumòna.” Nudi bamòne cindi njinga kwamba aci anyi? Mpindyewu konkàayi babàke bàbìdì abu. Ncítukù mwànji kubàmòna to kacya bándela. “Mvwa mùmvwè Bwèbè ne dicit dyànyì, mpindyewu ndi nKumòna nè dísù dyànyì.”

215 Bu nwènù mwà kwitabuuja, Nzambi ùdi mwà kufila cinùdi naaci dijinga aci's.

216 Muntu mulùme udi musòmbe pààpa wàwa ne cyanza cyèndè cikwàte ku cibàngà, nè lwendu lwà mashi àya lùbilulùbilu alu. Udi witabuuja nè Nzambi mmufwànyine kukusàngaja anyi, mukalenge? Udi witabuuja? Musòmbe nè cyanza cyèbè mùshindù ewu, udi witabuuja nè Nzambi neàkwondòpè lwendu lwà mashi àdi àya lùbilulùbilu awu anyi? Ela cyanza muulu, pawikala uCiitabuuja. Èyo, Yèyè ngudi ucyènzà. Kacya ncitu mwànji kumònakù muntu ewu to kacya bándela, ncyèna mumanyè kantu nànsha kàmwe pa bidi bimutàngila to. Kadi nuvwa bumvwè ne Yesù wàkamba, mu Bible emu nè, Yèyè neènzè bintu ebi, mpindyewu nwacimònu's! Nudi bamòne cindi njinga kwamba aci anyi? “Bu wèwè mwà kwitabuuja, bintu byònsò bidi mwà kwenzeka.” Ànu bwà aba bàdì biitabuuja's! Bidi bikèngela diitabuuja dilelèlè, dishùwashùwàle bwà kucyènzà. Kadi bu wèwè mwà kuCiitabuuja, Nzambi neacyènzè.

217 Kùdi inàbànza kampànda musòmbe lwà paanyimà apu, muntàngile, mwikàle nè cibòdibodi pa muminu wèndè.

218 Inǎbǎnzà udi musòmbe ku luseke lwèndè awu, musòmbe ku luseke lwèndè aku, bwà yéyè kuumvwa, inǎbǎnzà wàwa ùdi ne lwendu lwà mashi àya lùbilulùbilu, yéyè pèndè. Ncyà bushùwà.

219 Inǎbǎnzà udi musòmbe ku luseke lwèndè awu, ùdi pèndè ne—ne lutàtù. Nènku kǐ ngwa mùnwemu to, ngwà ku Arkansas. Ùdi ùcipangila's. Màndèmwàzela Phillips, itàbùùjà Mukalenge Yesù Kilistò nè òndopiibwè! Udi muMwitàbùùje anyi? Nè mwoyi wèbè wònsò anyi? Udi uCìitabuuja anyi? Cyà bushùwà. Dìbà adi udi mwà kucipeta.

Mpindyewu wèwè udi wamba ne: “Aci's ncyà kacyi cyùmvwika to.” To! To!

220 Yesù wàkamba ne: “Dìna dyèbè n'Simonà, udi mwànà wa Yona.” Ncyà bushùwà anyi?

221 “Mvwa ngùm vwa bwèbè Wèwè ku dici dyànyì, mpindyewu mmémè ewu nKumòna nè mèsù àànyì.” Mpindyewu kanwènaayikù numòna cyàkenzekà anyi? Muntu kampànda musòmbe ànu mwaba awu, munkaci mwà kutàngila, mwikàle wítabuujà, mwikàle wèyemena, nènku dyàkamwe ke cyòci aci cyènzeka. Nwamònu anyi?

222 Udi munkaci mwà kudyùm vwa bímpè, mwanàànyì wa balùme, dilòlò edi, kutàmba múvwà mudyumvwe makèèlèlè dilòlò awu anyi? Musòmbèle panshì apu? Bìdi bímpè mpindyewu, newikalè mwà kusàngala (uh-huh). Musòmbe kaaba aka makèèlèlè dilòlò awu, munkaci mwà kusaamisha mutù ne bikwàbò byònsò; mpindyewu, dilòlò edi, yéyè's ùdi ùmwèka bu muntu mùkàlàngà. Nwamònu anyi? Úvwa mubwejàkàjìibwe ndambù pa maalu kampànda, kàdi byònsò mbilongolola mpindyewu. Nwamònu anyi? Nebiikalè ànu bímpè. Nwamònu anyi? “Nènku mu ditùkù adi, Mwànà wa muntu mwikàle munkaci mwà kubuuludiibwa, nwamònu's, pabwìpì menemene ne Sodomà kwoshiibwayè.”

223 “Mvwa mùmvwè bàakula bwèbè Wèwè ne dici dyànyì, mpindyewu mmème ewu nKumòna ne mèsù àànyì. Mvwa mùmvwè Yesù Kilistò wamba ne Yéyè wàkalaya nànu, ndi mmòna mulayì awu ne mwoyi mpindyewu mene.” Nwamònu anyi? “Ngùm vù bàmba Bwèbè ku dici dyànyì, mpindyewu nyèwù mMumòna ne mèsù àànyì.” Mbanganyì bàdi bìitabuuja ne Awu n'Yéyè? (Éyì Nzambi!)

224 Mpindyewu, patùcìdi kaaba aka apa . . . dìbà dikaadi dyènda dipita. Mǎàlabà dilòlò netwikalè ne mudimu munènè wà dyondopa. Tudi batèkèmene ne Mwanèètù Moore ne mèmè netwimanè kaaba aka bwà kusambidila muntu yònsò udi muswè kulwa mu mulongo awu. Kàdi mvwa ngèèla meeji nè mu dyakula dilòlò edi, mvwa ànu muswè kwenza dibìikila dyà ku cyoshelu. Kàdi pashìishe mèmè kudyàmbidila ne: “to,” mwàkambaYe mwaba awu nè, “Mvwa mùmvwè bàakula Bwèbè ne dici,

mpindyewu ndi muswè kuKumòna ne dísù dyànyì.” Mpindyewu n’Yèyè ewu kaaba aka. Nudi nwitabuuja nàнку anyì?

225 Mpindyewu tütentekelanganàayi byanza muntu ne mukwèndè. Mpindyewu, vùlukàayi ne, Yèyè umweumwe wàkalaya ne Neènzè cyôci *eci* awu, wàkamba nè: “Bimanyinu ebi nebifilè aba bàdì bìtabuuja.” WàkaCyàmba anyì? Wèwè udi mwena kwitabuuja anyì? Ambà nè: “Amen.” Èè, dìbà adi, Nzambì umweumwe wàkenza mulayi ewu unùdi nuMumòna wènza mpindyewu ewu awu, . . .Konkàayi yònsò wa ku bantu abu, ncitukù mwànji kubàmòna to, ncyèna mumanyè kantu nànsha kàmwè pa bwalu bwàbò to. Ncyèna mufwànyine kubàmanya mpindyewu mene to, nwamònu’s, ncyèna mwà mwà kucyenza to. Kàdi bìdi bìkèngela bwà Mufùndu awu kuulawù’s! Èè, aci cyôci cyùle, cìdi cìleeja ne tudi mu bikondo byà ndekeelu, netùmanyè nè Mwànà wa muntu udi pabwìpi nè kwikala . . . pabwìpi nè kulwa, bwalu Yèyè ùdi munkaci mwà kuDibuulula mu mubidi wà buntu. Ncyà bushùwà anyì?

226 Dìbà adi tudi tumanya ne ncilelèlè, kàdi wèwè udi wamba ne udi mwena kwitabuuja mu Yèyè, ne nudi ne byanza bitentekelangana muntu nè mukwèndè. Nènku piikala byanza byènu bitentekelangana muntu ne mukwèndè, Mwànà wa Nzambì umweumwe udi kaaba aka bwà kufikisha *eci* ku diikala cilelèlè ku mèsù kwènù aku awu, Mwànà umweumwe awu ùdi kaaba aka bwà kwamba ne: “Nebàsàngalè!” Mwànà wa Nzambì umweumwe awu’s! “Mémè kuumvwa ne Yèyè wàkamba ne: ‘Beena kwitabuuja bôbò batentèkèlàngàne byanza, babèèdi nebàsàngalè.’ Mémè kucyùm vwa ne maci àanyi, mpindyewu ngànji ncimònèbi ne mèsù àanyi’s. Yèyè mmulayè bwà kucyènza.”

Mpindyewu pàndi nsambila apa, nwènù sambilaayi.

227 Mukalenge Yesù, mu Dìna dyà Mukalenge Nzambì wa mu Dyulu, enzàku bwà Nyumà Webè àbwelèku mu mwoyi wà bantu aba; diitabuuja dishùwashùwàlè dyà Nzambì adi, diikalè mwà kubàshindikila mulayi ewu. Nènku Nzambì wa mu Dyulu wòndopèku yònsò wa kùdibo, pàdibo bàtùmikila mèyi Èbè matùma awu ku ditentekelangana dyà byanza muntu ne mukwèndè apa. Biikalèku nàнку, Mukalenge. Mu Dìna dyà Yesù Kilistò, enzàku bwà biikalè nàнку, bwà butùmbi Bwèbè.

228 Mpindyewu, udi witabuuja ne udi mupetè cyùdi mulòmbe aci anyì? Cintu kampànda munda mwà mwoyi wèbè amu cìdi cìkwambila nàнку anyì? Udi umvwa kaadisonsodiibwa kakesè aku anyì, kàmba ne: “Mòna’s, nkumane kujika! Nkupwè!”?

229 Dìyi ditùma dyà Nzambì ndyambè ne tudi bafwànyine kucyùm vwa ne dicit dyètù, mpindyewu tudi mwà kucimòna ne dísù dyètù. Yobò wàkamba ne: “Ngùm vù Bwèbè ku dyumvwa dyà ne dicit, kàdi mpindyewu ndi nKumòna ne mèsù àanyi.”

<sup>230</sup> Mpindyewu, nuvwa bacyūmvwè ku Dìyì, ku dyumvwa dyà Dìyì ne: “Dii tabuuja didi difūma ku dyumvwa, dyumvwa dyà Dìyì.” Mpindyewu nudi nuCimòna cyènza maalu, ne mèsù ènù! Mpindyewu, Nzambì umweumwe wákamba cyòci aci awu, pàvwà bintu ebi ne cyà kwikala munkaci mwà kwenzeka, ne “beena kwitabuuja pa Yèyè ewu nebàtentekelè babèèdi byanza ne bôbò nebàsàngalè.” Mpindyewu ncibwèlè mu mwoyi wèbè awu amu ne: “mwondòpìbwe anyi”? Elà cyanza cyèbè muulu piikalàci cibwèlè. Amen! Ki dyondopa dilelèlè dyà cipostòlò ndyòdi adi. Ki cyùdi muswè kwamba anyi? Udi uCìitabuuja ne mwoyi wèbè wònsò anyi? Àlèluuyàh! Ki cyònsò citùdi tukèngela ncyòci aci.

Tùjuukilàayi kuulu tùMupè butùmbi, dîbà adi’s.

<sup>231</sup> Twasàkidila, Mukalenge Yesù. Dìna dyà Mukalenge dibèneshiibwè.

NémMutùmbishè, némMutùmbishè,  
Ntùmbisha Mwànà wa mùkòòkò mushipa bwà  
bangènzàmpèkààtù;  
Mupàayi butùmbi nwènù bantu bònsò,  
Bwalu Mashi Èndè mmasukùle dikeji dyònsò.

<sup>232</sup> Mpindyewu, nudi baMunange anyi? Mpindyewu, twètù bònsò cyàpànwè, tùMupèèshaayi butùmbi, nwènù bantu bònsò. Mpindyewu, tàngilàayi, piikalà cyòci aci cikubuulwila kùdi Nzambì, mu kajila kaùvwà musùngidiibwemu aku, nkajila kàmwèkàmwè aku kààkakwambila ne: “uvwa musùngidiibwe,” kajila kàmwèkàmwè aku mmwàkakwàcila Nzambì mudimu, bu mwàkakwàcilàYe mudimu mu Yobò ne mu bapròfetà, Yèyè mmukwàcile mudimu munkaci mwènù kupìcila mu kajila aku wèwè bu mwena Kilisto, ku dibuulula Dyèndè dyà kùdi Nzambì dyà ne: “udi mwondòpìbwe,” dîbà adi kakwèna cintu cyàcipangisha bwà kwenzekaci nànsha.

Pa nàнку tùMupàyi butùmbi nwènù bantu  
bònsò,  
Bwalu Mashi Èndè mmasukùle cyònsò...  
(Mpatà yònsò; mmasukùle mpatà yònsò.)

NémMutùmbishè, némMutùmbishè,  
Ntùmbisha Mwànà wa mùkòòkò mushipa bwà  
ngènzàmpèkààtù;  
Mupàayi butùmbi nwènù bantu bònsò,  
Bwalu Mashi Èndè mmasukùle dikeji dyònsò.

<sup>233</sup> Kaa, kanwènaayikù baMunangè anyi? Aa, bilenga kaayi’s wè. “Nkàadi muumvwè Bwèbè, Mukalenge, nè dici dyànyì, kàdi’s diitabuuja didi difūmina ku ditèeleja; kàdi mpindyewu ndi nKumòna, Nzambì ùDimanyisha munkaci mwà bantu Bèndè mwàkenzàYe kùdi Abraham amu, ku mulayi Wèndè mwaba ewu nè Mwànà wa muntu ùvwa mwà kuDibuulula mu matùkù àvwà bàà pa buloba bashàale mu ngiikàdilù wa Sodomà.”

234 Nènku kùvwa baamisànjeelà bàsàtù bààkapàtukà, bààkafùmina mu Dyulu.

235 Nènku kùvwa kasumbu kàà cyena-màngumba lwà mu Sodomà amu, ne Billy Graham ne Oral Roberts bàkapwekamù. Nènku vùlukàayi ne ànu mungānwāmbidì, mwaba nànsha ùmwè mu maalu-malonda à èkèleeziyà kacya kakùtukù kwanji kwikala mùsànjeelà mutùmiibwe pa buloba bujimà, too nè mpindyewu, nè dīnà dyèndè dishiikila bu dyà Abraham, nè h-a-m. G-r-a-h-a-m, màleetà àsambòmbò, kùdì bàà pa buloba, nombà wa muntu.

236 Kàdi Abraham ùvwa nè màleetà mwandamutekète mu dīnà, nombà mukùmbànàngāne wa Nzambi ne mupwàngāne. Nwamònu anyi?

237 Nènku mōnaayi cyākenzà baamisànjeelà bààkayāmu abu: kuyiishabò Dīyì, kubàbiikila bwà kupàtukabò, kubàmbila bwà kunyingalalabò.

238 Kàdi Ewu Wākashàala paanyimà ne Abraham awu, nwamònu's, wākenza cishimà pa kwambila Abraham cīvwa Sarah wēza ne wēla meeji mu ntentà paanyimà Pèndè. Nènku Yesù, Uvwa Ewu uvwa mu Mupèrsonà ewu awu, kwambayè ne: “Cikondo cyāfika bàà pa buloba mu ngiikādilù wa Sodomà, bu mwākadibi musangu awu, Mwānà wa muntu neābuuludiibwe cyākābidi.” Ne Mifundù mikwàbò yōnsò ayi yidi yishindika ne bidì nānku. Kùdì. . . “Ku cibangidilu kwākadi” [Disangisha didi dyamba ne: “Dīyì,”—Muf.] “ne Dīyì dyākadi nè” [“Nzambi,”] “nè Dīyì dyākadi” [“Nzambi.”] “Ne Dīyì dyākavijiibwa mubidi ne dyākasombela munkaci mwètù.” Ncyà bushùwà anyi? Mpindyewu tudi tumōna Dīyì dilaya dimwèdimwè adi, dyà Luukà, dyà Maalākì, milayì mikwàbò yōnsò yà kuumukila ku leelù ewu eyi, divwijibwe mubidi, disòmbèle munkaci mwètù, mutùmvù nè maci ètù emu; mpindyewu tudi tuMumōna (nè mēsù ètù) umvwija Dīyì Dyèndè Yèyè mwinè, katwèna dijinga ne dyumvwija kampàndà dyà muntu to. Èyì Èkèleeziyà wa Nzambi udi nè mwoyi, kaaba aka nè ku maatèlèfonè, tàbulukà ne lùkàsà lwōnsò, kumpàlà kwà dībà kwikaladi dipite! Nzambi anùbènèshè.

Ndi muMunange, ndi muMunange  
Bwalu Yèyè wākannanga kumpàla  
Ne wākampetela lupàndu  
Ku mucì wà Kālvariyo.

239 Nudikù mwà kwela meeji, nwēnù èkèleeziyà, bwà ne nudi munkaci mwà kutàngila ne mēsù ènù sungasunga. . . Dīyì didì ne mwoyi dyà Nzambi dimwènèshìibwe, mulayì wà dībà edi, mu matùkù à ndekeelu, biikāle nutàngila ne mēsù ènù nwēnù biine ku Dīyì didì nè mwoyi diikāle munkaci mwà kuumvwijiibwa mu mmwènekèlu wa mubidi, Nzambi munkaci mwètù! “Ndi mMumōna ne mēsù àanyi sungasunga,

Yèyè awu. . . Mémè kuumvwa ne Ûvwa mwà kucyènza.” Beena meeji bõnsò bàà kale bààkakèba ditùkù edi, mpindyewu tudi tuDimõna dimwèneshiibwe ku mèsù ètù sungasunga. Mbanganyi bàdi ba-Méthodistes bàà kale beedi bàà mbilà, ba-Baptistes, ne beena mpenta balelèlè, bashùwashùwàlè mu cikondo cyàbò, bàvwà bajingèjinge kumõna cyòci eci cyènzeka! Bààbùngi bàà kùdibo bàvwà bamanyè ne civwa mwà kwenzeka. Kàdi tudi biimàne dilòòlò edi tucimõna cyènzeka’s! Kaa! Kanwènaayikù baMunangè anyi?

<sup>240</sup> Mpindyewu, Yesù wàkamba ne: “Bantu bõnsò aba nebàmanyè ne nudi bayiidi Bàanyi ku eci, panùdi banangàngàne muntu ne mukwèndè.” Pa nàнку bu mutùdi baMunangè, tùlabulanganàayi ku cyanza muntu ne mukwèndè ne twimbàayaaku nè *NémMutùmbishè, NémMutùmbishè, Èyo.*

NémMutùmbishè, némMutùmbishè,  
Kaa tùmishàayi Mwànà wa mùkòòkò  
mushipa bwà bangènzàmpèkààtù;  
Mupèèshaayi butùmbi nwènù bõnsò. . . (Nudi  
nudyùm vwa bìshi?) . . . cisàmba,  
Bwalu Mashi Èndè mmasukùle dikeji dyõnsò.

<sup>241</sup> Mukalenge-mukàji wa Beleshààsà wàkamba cinyi kumpalà kwà mfùmù wendè dilòòlò adi? “Kùdi muntu mu bukalenge bwèbè udi kamana-mpatà.” Nè Nyumà Mwimpè, dilòòlò edi, ke Kamana-mpatà’s! Nudi nwitabuujà aci anyi? (Cìdiye muswè ncinyi? Kaa, Aci’s ncimpè.) Kamana-mpatà’s! Mpindyewu, Mashi à Kilistò àdi ùmusha dikeji dyõnsò, dikeji dyà mpatà. Kakwèna mpèkaatù pa buloba apa mutàmbe bunène kupita bupidyà to, “Bwalu ewu udi kàyì wìtabuujà, mmumanè kupiishiiibwa!” Ncyà bushùwà anyi? “Ewu udi kàyì wìtabuujà mmupiishiiibwe.” Kùdi mpèkaatu ànu umwèpelè, mwinè awu mbupidyà. Kunwà kwà mfwankà kì mpèkaatù to, kwèlangana milawu kì mmpèkaatù to, kwenda kwà masandi kì mmpèkaatù to, kushima kì mmpèkaatù to; aci kì mmpèkaatù to, aci’s ke bipeta byà bupidyà. Bupidyà’s! Udi ucyènza mbwalu kwèna wìtabuujà to. Wèwè muCitàbùùje bulelèlè, kwèna ubyènza to.

<sup>242</sup> Kaa! Kaa! Cidì. . . Bilenga be! Ne Mashi à Mwànà wa mùkòòkò mmasukule mpatà yõnsò. Tudi twìtabuujà Dìyì Dyèndè, ne dishindika dyõnsò. Tudi twìtabuujà ne Dìyì dyàkavwijiibwa mubidi. Ne tudi twìtabuujà ne Dìyì *didi* divwijiibwe mubidi ku dishindika dyà Bwikadi Bwendè mpindyewu bwà kushindika Dìyì Dyèndè. Nudi nuCitàbuujà anyi? Nzambi ànùbènèshè.

<sup>243</sup> Tudi tutèkèmèna ne netùnùmònè kaaba aka mu dindà, bwà cikondo cyà butùmbi mu Mukalenge. Inyikaayi mitù yènù mpindyewu, ne ndi mfila disangisha kùdi Mwanèètù Lindsay. 🐾



65-1127E Mvwa Ngùmvwa Kàdi Mpindyewu Ngàmòù  
Life Tabernacle  
Shreveport, Louisiane États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyì dya bwena-cintu

Makenji ònsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)